


## OKHALIHIWA AANA <sup>4</sup>

 Munna Neville, nto ehaali ya makaaripi, kiireke, muhiileliwa, axipatthan'ihu ooreerexa, nooteeliwa murima otthikela va mukereja ohiy'ula. Vaaviha vakhani, nto siiso ninrowa weesa waakuva saana ntoko sinweryaney'aya, naanaanoru ninrowa okelela Mutthaka.

Yoopacerya, nookhalana soohimya kamosa-kamosa wira nihimye, ni o—ovekeliswa wa malompelo oomeekha. Kookhalana ipaphelo sanyu ottuli iwo, sivahiwe, ni sa munna mmosa muthiyana onooka wira orina nipotthe mottooporeni. Ni aahikhala mukina oLouisville; ni munna a murumeyi mmosa, atithi awe onaawereya murima; ni aakhala athu anci-ene, anci-ene anwereiwa mulaponi olelo. Anci-ene anniihana ni vekeekhai hiyo ninnivekela ni murim'ahu wothene, wira Muluku anikhaliherye.

Voolimaleleya ipursento soophiyaka miloko mithanu na mixexe sa muteko aka okathi wothene ti yeeyo, waavekelela aretta, moone, masi miyo—miyo kookhalana ntoko mo—moonelo mwaamukhaani wira... Miyo nlelo kinnaavekelela aretta, vano, muupuwele yeeyo. Eyo enrowa vamosa ni yeeyo. Masi, oh, nawerya-ru ophiyerya e—ekereja vatthu enikhalihiw'aya voopuroni, nto, n'ukhala oratteene vanwery'ahu ovara muteko, moone. Ehaana okhala oratteene, moone, okhaliha sothene oratteene.

Ethhu ekina tho emanle othananiha murim'aka, okathi vakhani ovinre. Owo p'ukathi mwaamulopwana mmosa mutokweene, moonoo awe mmosa waahanle okhuma mwaha wo woopeliwa, mwetto waahanle okhuma mwaha wo woopeliwa. Owo khokhanle vaava wira okiiwe okathi ene yoola. Masi mutthu mmosa ooreera murima, oniihaniwa Roy Roberson, ni mmosa wa maatiministratoore ahu va okereja, ni mulopwana mmosa muKristu oottittimiheya. Owo oroovolowa mme, khwira, "Munna Branham, muhimuliyale Mukhulupale." Khwira, "Yaahikixankiha saana okathi owo okenly'awe," koonale mutelevisawuni, "owo akhuruwaka mmuttekeni, maithori emoraka mmalakuni mwawe, ni eyano awe emetuwaka epante emosa." Moosuwela, owo aari weiwe ni Roy n'akina, okho—okhottoni iwe.

Hata wira munoovirikanyana n'uwo muhina wa ipoliitika, owo nlelo ti Mukhulupale ahu. Ayo, mulopwana. Wa miyo, miyo—miyo nkiihiyo Temokrata wala Repuplikaano. Miyo ka muKristu. Masi miyo—miyo kinimooleelani, vekeekhai kaanimuthamala vanci-ene mu—Mukhulupale Dwight Eisenhower. Mwenye, owo vekeekhai aari mutthu muulupale,

mwa enamun'aka yo—yo wuupuwela. Vaakhanle wira aamuxiraana-tho, ni miyo kirowaka othanla, kaamurowa omuthanla-tho yoowo. Eyo ekeekhaii. Khenikicala sinto owo aarowa okhalana—sinto aarowa okhalana iyaakha emiya, miyo nlelo kaarowa omuthanla yoowo, okhala wira onnikisivela. Nto rowe nimuupuwele mmavekeloni mwahu ohiy'ula.

J. T., miyo vekeekhai onnikisivela muthukuman'ole wooreera, nyuwo othene, nyuwo ni Munna Willard mwaarin'anyu esumana yeela. Vaakhanle wira kaarookela kikhumaka vate, nyuwo othene khwira, "Vaareera, Munna Branham vano, nyuwo munnimusuwela, *lexe ni lexe*." Masi vanreerela mweemele vate paahi ni woowiriyani paahi, khamunooona? [Munna Branham onotheya—Mol.] Vaareera. Vano, ti wooreera saana.

Kookhalana soovaha kamosa-kamosa sa ikereja kamosa-kamosa, nyuwo othene mwaatthunaka vale, mwaary'ene oolikana vano wira murowe mwalaleerye, mwarineene exuttiheryo anyu. Ni, yeeyo, kinaamini aka wira mookhalana, ni muhaana sothene oratteene. Miyo kihaana emosa wOregon, ekina oWashington, California, ni Arizona, mapuro oohiyana-hiyana. Nto nyuwo mwakhalakhala mutthunaka okuxa ekereja wala etthu p'itthu, vano, vaava va ti nipuro nooreera opaceryavo, vaava va. Ni sookhala minepa sininla mapuro othene, hata mwa itakhwa sinuureliwa sa oHintiya ni vatthu ti vatthu muntthun'anyu orowa-wo. Munilopole paahi, okhala wira kookupali wira nyuwo amiravo muri oolipa vano. Eyo ekeekhaii. Vannikisivela paahi owoona yiirasaka yeeyo.

Vale ori Munna Ruddell osulu iwe mphironi. Ninrowa okhalana muthukumano wa yoowo, mahiku vakhani. Onrowa okhalana muhakalaliho, Munna Ruddell t'onrowa. Nto miyo—miyo kinuupuwela wira kaanimpurulelaka mwaapar'ole mwaamukhaani mapuro othene, kitthunaka omwiiriha owo okhumela mmutekoni n'ulaleya. Owo aari owiimaaliha saana. Owo iiraka, "Miyo nkinwerya olavula tu." Mwaahaana omwiiwa. Amen. Munnona? Khamunsuwela etthu ekhanly'anyu wiiraka mwahiya-ru Eroho Yowarya woovarelelani. Eyo ekeekhaii.

Nto Munna Graham Snelling oUtica, ni Munna Junior Jackson ohitto wu. Hiyo—hiyo ninnaattitimiha othene aya ntoko ikereja sikhaani axinn'ihu, ni hiyo. Hiyo othene nri vamosa. Khaninvaanyihana mwa miixuttiho sahu, wala miroromelo sahu ni sootthuna sahu, miixuttiho sahu, sinkhala imosaru. Hiyo ninkhala vamosa, itthu sothene vamosa. Hiyo na ekereja emosa paahi. Ni vekeekhai naatthuna nikhalanne-ene oomwaramwareya mapuro othene; nookhalana amosa-amosa wAfrika, akina oHintiya, ni mapuro othene, mulaponi mothene. Ti weiwo hiyo onaatthun'ahu-wo, omwarya Ihapari.

Ni kinniwoona amiravo ala erwaasaka, ntoko Munna J.T. Parnell va, ni—ni Munna Willard n'akina, okathi anirwaas'aya, amiravo, okathi miyo onuuluval'aka. Nakhalaru nihiku na meelo, awo anookhalasa axilopwana yaawo a meelo. Miyo nkinthuna wira Mutthak'ola okhwele nnakhala. Khivanweryaneyya. Ohaana olekela. Ni nkikupanli wira nihaana okathi munci-enexa wira niruuhe Yoowo.

Mwanamwane ole yaahimmwe wira aarowa okhwa, kinnoona wira muri ni yoowo mukereja nihiku nothene olelo, munna. Ti yooreera saana. Ninnaaxukhuru Apwiya mwaha wa yeeyo, wira Apwiya t'oreera murima, oomoriwa ikharari saana. Mukhale mwaaminiki paahi ele muhimeeriw'anyu vaava, moone, sothene sinookhala saana.

Vano, munnisiveleliwa mwixuttiho? Onnoosivelani mwixuttiho? [Muthukumano oniira, "Amen."—Mol.] Oh, miyo—miyo—miyo vekeekhai kinoona wira onninikhaliha saana. Onninivaha omumula vakhani wo waavekelela aretta, ni soowoona, ni ovoniha wa Muluku. Vekeekhai, vano, ohiy'ula hiyo... Nuumala muteko, ninrowa-tho waavekelela aretta, ohiy'ula. Hiyo ninnitthuna wira yeeyo okathi wothene, omupatisa mutthu ti mutthu okathi p'ukathi.

Akavi anupuwela okathi weettelel'aka iliinya sa norexiiya? Ahe, kiheettelela iliinya sa norexiiya, imaara sinci-ene, kaahaana weetta ikilomo imiya xexe ni thanu na tthaaru nihiku nimoso mothakoni. Kaakhalana ikilomo imiya xexe ni miloko mithanu sa eliinya wira keettelele. Kaamurowa kikhuruwelaka iwe, ni ekamisa mmatatani mwaka, ni, oh, ookhulumuwa saana, kivraka itakhwa iye, ni miiwa sikithi sikithikilaka. Kaanikumana ni naxuulu mulimi n'ukilaathi mukhitte mwa mwiri n'ulavula—no sa opatisiwa ni Nsina n'Apwiya Yesu. Owo aamwiira, "Ahe, kweekwe kaanithuna opatisiwa."

Miyo kiiraka, "Khivarakamelanxe muratthi." Vano owo aamwiira...

Ni kinnaakuxaka anci-ene aya ohitto iwe ni waapatisa ni Nsina na Yesu. Kaanithikela kirowaka kittharaka eliinya, kaakuvaka ntoko saawery'aka. Eyo ekeekhaii. Imaara sinci-ene n'ikuwo saka sa khalayi sa muteko, kaanimpatisa mmosa, kaanikhuruwa nipotto. Kaanikilaathi osulu iwe kivaraka muteko epante ekina ya nipotto; kaari namookola iliinya, nave, kivaraka muteko epante emosa mpakha ekina ya eliinya, ni mutthu, kilavulaka ni yoowo sa Apwiya. Owo aaniira, "Vano, Billy, nihiku nlo kinimoorwa okereja wanyu kipatisiwe."

<sup>2</sup> Miyo kiiraka, "Xeeni otthunaka olipelela mpakha okathi yoowo? Niri vakhiviru wa muro, aakhala maasi manci-ene vale." Mwaavare naanaano va. Ti yeeyo. Owo p'ukathi. Filipe iirale...

<sup>3</sup> Mulipa—oohuliwa aamwiirenle Filipe, "Ala va maasi, xeeni ennikhottiherya?" Eyo ekeekhaii. Hat'ethu. Mwaary'ene

oolikana, owo p'ukathi. Muhimuhiye xetwani okhalana okathi w'okeliha etthu mmo. Muhintererye meelo itthu mwaakhanly'anyu wiiraka olelo. Meelo siiso ohiphiyaka wa nyuwo. Miyo kinnuupuwela okathi uwo kiiraly'aka yeeyo, kaahiixutta, yaahikixuttiha nikano. Kaarimunteerya etthu yaatthuneya wira kinre-ene nihiku nimosa, nto mmeeloni mwaya vaahixa.

<sup>4</sup> Vano, vekeekhai nkinthuna woopisihani okathi ula wothene. Masi kinikhala paahi o—oowuukhuwa saana, ni, nkinsuwela, kinoona oreera saana mpakha kihiniisuupuwel'aka, kinnihalela. Kinoona oreera paahi.

<sup>5</sup> Vano nrowe nuurame miru sahu okathi vakhani paahi nihinatthi waattamela Masu.

<sup>6</sup> Tith'ihu a Wirimu, Nyuwo mwa Muluku mukumi, mukumi voohimala. Nsuwa nimanle otupweela, nsuwa nene nenlo, Danyieli aawehaly'awe okathi naatupwenly'aya, Yeremiya aahiweha nitupweelaka, Atamu aahiweha nitupweelaka, Yesu aahiweha nitupweelaka. Ni t'ulumwenku mmosaru awo yaakhalas'aya ni yeettaly'aya-mo, nave Nyuwo nlelo munikhala Muluku yoowo mmosaru.

<sup>7</sup> Ohiy'ula sookhala soovekela sinci-ene. Mulopwana mmosa orina nipotthe moottooporeni, munna mmosa muthiyana onoova etthu ene yeeyo. Nyuwo mwa nrromelo mmosa paahi, Pwiya, okhanle wa yeeyo. Nipotthe nlo nookhala nootakhala, khiivo enwerya omaaliha. Nri ottaiwene v'ophiyeya wa ntata na tothoro. Masi ohiy'ula hiyo ninrowa ni pharancikula ahu mwaamukhaani, nimmurwela mwaapwittipwitthi uwo, wira nimuttikiherye munikhomani mw'Atithi. Mwa Nsina n'Apwiya Yesu ninlukamiha nivekelo nahu wira nimwiive kharamu, nipotthe, otakhala, wira naaruhe salama munikhomani.

<sup>8</sup> Nto hiyo, Muluku, ninnimuupuwela ohiy'ula Mukhulupale ahu oophenteya, munna, Dwight Eisenhower ahu. Owo onneettiherya elapo, Pwiya, onniilipiha wira nihikele mukhottoni. Owo oohimya wira ekhotto y'oKoreya yaammala aakhalanne-ru enamuna yo owerya wira. Owo ohaahimeerya natiri aximai awo wira aamwaahokoloxa aximiravo ale. Masi owo ohimnye wira, "Wa miyo wira, nkinwerya wira. Miyo kinoohelala ikuru saka, masi Muluku paahi ohaana wira." Ni Nyuwo mwaari ni yoowo, Pwiya, nto vano sothene soolakiheriwa. Xeeni awo yahaweraly'aya woona yeeyo opacerya wene? Muluku, miyo kinvekela wira Nyuwo mmukhaliherye. Mureerihe munep'ole woominyala, Pwiya. Ni ninvekela wira Nyuwo munithanlele ole onrowa okhala mahoolela ontharelana. Otthuna Wanyu mutthomenly'anyu wiiraneye, Pwiya.

<sup>9</sup> Masi Ole onicaliw'ahu saana ohiy'ula, voohikhala myaha sahu sa mulaponi, t'Ule muulupale ni oovuwa onrwa wira

akhalihe Omwene ohinrowa omala, Pwiya Yesu, Mwan'Inyu. Vano awo anoothukumanya ipa, iyoopelo sinooruma ni khasinrowa okhala-tho ikhotto. Anrowa ophattheya miri saya s'eviteera ni animoolya mihokorokho saya. Anooteka ipa, ekhale memmo. Ni khasinrowa-tho okhala mikattiyamiho nto nuumala yeeyo.

<sup>10</sup> Munireerihe vano okathi onaattamel'ahu Masu. Ni, Tithi, Nyuwo moosuwela mwaha onikumihery'aka Masu okhuma Yoolempwa yeela va. Okhala wira miyo—miyo kinnoona wira Nyuwo muntthuna wira kiire siisa, wira p'utthuna Wanyu w'eMuluku, eri v'oruma Wanyu, eri muhina. . . ti yooruma ya nihiku, owiriha athhu ophwanya opuro aya wookhalihiwa ni okhala oolikanela okathi w'ekhotto. Ntoko munn'ihu sihimaly'awe mmavekeloni mwawe wa Nyuwo woohikhala khalayi, "Oh, Nyuwo moonixuttiha okathi munci-ene, Pwiya." Vano, Tithi, munivahe iliinya sahu. Minihele ota iwe wa etthu entthuneya hiyo wira, wira niwerye okhala mmutekoni mw'Atithi. Vano hiyo ninvekela mwa Nsina Yesu, Mwan'Inyu. Amen.

<sup>11</sup> Kaahikhalana oxekuwa wooreerexa oxekuw'ola, kilavulaka ni tothoro mmosa oosuweliwa oLouisville, nfulumeera awe. Awo arimwiiwa sa itthu soovuwa s'APwiya. Vano atithi awe yaari tothoro. Vano owo khurwa khukilaathi musaala mwaka okathi munci-ene w'oxekuwa, aarimoorwa paahi, khukela voohuupuwelela. Mutthu mmosa ooreerexa; masi oolipa vakhani, moosuwela, ntoko muPrespiteriyaano, oororomeleya saana opacerya wene, masi aakhumme ni maithori emoraka mmalakuni mwawe. Oh, miyo. . . Muluku ookhalana anihela mapuro othene, muskiritooriyyu wa matothoro, mwa manfulumeera. Nkikupanli wira ookhala nfulumeera Oxipiritaali ya miteko sa Enfermariya Norton kihimuhimenry'aka sa okhalana Eroho Yowarya, ni omukoha sinto aahipatisiwa ni Nsina na Yesu. Khaavo tothoro kaakumanann'aka-no, nipuro pi nipuro, wala hate. . . Munnona?

<sup>12</sup> Mwaaleele sa Yeeyo. Hiyo khanrina okathi munci-ene, munna. Hata enlipa sayi nno, mulipelele paahi nvire ephumu iyo yookiserya iwe nto moone, vano munooththuna wira mwairale eyo. Ayo, mulopwana. Muhilipelele mpakha okathi yoowo, nrowe niire naanaano va. Ola p'ukathi. Oh, awo pooti ovaanyiha, onanariwa ni onyakulihana vakhani mwaha wa yeeyo, masi awo khanlakela eyo. Awo vekeekhai khanlakela. Awo—awo—ari saana. Awo yaanyakulihanaka ni nyuwo, paahi—muupuwele paahi, awo—awo vekeekhai khanlakela. Awo khanlakela. Awo vekeekhai khino arooxuttihiwa etthu nto enavarelela yeeyo, tivo nyuwo—nyuwo munoowerya woona muupuwelo aya. Muhinyakulihane n'awo, muhinyakulihane ni hata mmosa, masi mwaaphente paahi mwaakelihaka Memmo. Vano mwaalompele.

<sup>13</sup> Ahe, kinoona wira noophiya eversiikulu 19, nkikupalanxe. Eri ottaiwenexa wa eversiikulu 3, kahi siiso, alopwana? Masi oh, Owo oravo muhina mwa mwala, wa miyo! Naamulavula vano, muupuwele, wira nikhalane mulipiheryo mwaamukhaani tho. Nto vano, Munna Neville, nyuwo—nyuwo mukipurule vakhani vano kavonya vale woona okathi oviraka, wira kikhalane waavekelela aretta. Nintthuna noone khula ekapatti yaamukhaani enwery'ahu. Ni ohiy'ula kintthuna wiihana waltaari. Miyo...Kimalelaka mwa yeela khino kinrow'aka owerya osoma paahi ele ehanle.

<sup>14</sup> Masi niwoko na yeela, ti, woona opuro anyu mwa Kristu, woona wira kehiyo etthu mukumananne anyu voohilipelela, wala etthu yaakhanle okhalanaka . . . nyuwo muphwanenly'anyu nipuro nlo, masi ti Muluku owiireneni, Mmansawe. Kahi wira mwaarookhala ooreera murima wira mwaahirowa okereja ohiyu umosa, wira munna mmosa namuhaawi oorohaleni mpakha waltaari. Ni khiyaari yeeyo. Ti Muluku, ohinatthui opattuxiwa olumwenku, ootthomenleni Ekumi Ehinimala. Okathi onrow'anyu ophiya awo nihiku nlo, khivanxankiha miloko mixexe . . . mahumu miloko miili n'axexe yaarihenly'aya ikhara saya, atthu othene yaahihya ekhara aya, othene yaahikokhora yuuramaka, awo khayaarina etthu yaakhanly'aya oohimyaka, hata mulaleyi, hata humu, hat'etthu. Othene emuttotlopele Mwaapwittipwitthi! Muluku onoothukumanya itthu sothene mwa Yoowo nihiku nlo. Oh, vaakhanle wira naamukhalakhala nисуwelaka ni nimusuwelaka aari Pani Ole awo yaamukhomenly'aya. Vano va . . .

<sup>15</sup> Nimpacerya eversiikulu 8, wira nikhalane mulipiheryo mwaamukhaani.

*Yaawo onivahaly'awe voowaatta n'ankhili othene ni miruku;*

*Oonisuweliha mwiiriirya w'otthuna wawe, . . .*

<sup>16</sup> “Miiriirya s'otthuna Wawe.” Ni munnuupuwela moota naalekenly'ahu vaavo? Akavi yaari vaava voosiis'ula, nrowe noone. Moota naakhanly'ahu vaavo, “mwiiriirya w'otthuna Wawe.” Vano, eyo kahi etthu yaamukhaani paahi, nto owo mwiiriirya. Otthuna wa Muluku mwiiriirya. Ni khula mutthu ohaana ophavela otthuna wa Muluku wa yoowo mulopwana wala muthiyana, mwiiriirya wa Muluku.

<sup>17</sup> Hiyo ninsuwela sayi? Paulo, aahisuwelihiwa owo. Owo ohimnye wira kaamukonhe hata mutthu, hata erutthu n'iphome. Owo khaaronwe hata exikola, hata eseminaariyu. Owo khaarina naata n'iyoy. Masi owo . . . Aarimuupululeliwa yoowo ni Yesu Kristu, Yoowo akumananne awe arowaka oTamasiku, mo—moWaaryani ntoko Nlumi na Mooro, vano Nlo khumwiihana. Nuumala khurowa wArapiya, khukhala weiwo iyaakha tthaaaru. Oh, khamuntthokelela wira owo

waari okathi muulupale, Munna Egan? Iyaakha tthaaru Paulo ory'ene iwe w'Arapiya, khurentteri empa yaamukhaani nipuro nlo, eettaka osulu ni vathi, ni isapala sothene soolempwa sa khalayi. Awo khayaarinasa iye isya; Paulo t'olempa, sinci-ene saya. Musapalani seiya soolempwa sa khalayi, moota Muluku, wopaceryani, onitthomenly'awe Ekumi Ehinimala. Moota Owo aamurumm'awe Yesu, wira mwa Mukuttho yoola hiyo nikhhalane ehaakhi ya Mwiri w'Ekumi. Ale Owo aasuwenly'awe khalayi ene, Owo oowiihana; ale Owo owiihanne awe, Owo ohaakhalaha anaxariya; ale Owo aakhalinh'awe anaxariya, Owo ohaavuwaha. Muluku, okhuma wopaceryani w'olumwenku, oonitthoma wira nikhale aana. Vano soopattuxiwa sothene sinniipulela, silipelelaka wooniheriwa w'ana a Muluku. Oh, kaamutthokelela wira Paulo aarina okathi wooreerexa. Kaanitthuna kikhanlene ene weiwe ni yooowo. Ankhi nyuwo?

18 Vano owo ohimmye wira, "Owo oonisuweliha mwiiriirya." Mukhalane Eroho Yowarya mwa nyuwo emaara emosa, ni mpacerye othokosa Yeeyo nto moone paahi moota entaphuw'aya Yeeyo. Oxekuw'ola kaahikhalana, oh, minuutu soophiyaka miloko miraru wira kisome, wira kiviravire nisomi nenlo; khino nnari, kinoohimya wira nuusu na yeeyo, minuutu muloko ni mithanu muhina m'okathi. Vano khwaakuva, nto kuupuwela, "Mwiiriirya, moota otikinithe aya!" Nto Yoolempwa khukihokoloxa mpakha Waataana Wa Khalayi, vano khutthikela Waataana Wa Naanaano; khulutta ethu, wona mwiiriirya wa Orwa Wawe, mwiiriirya w'otthuna Wawe, mwiiriirya wa hiyo nry'ene vamosa. Muupuwele, khokhanle wiixuttihiwaka mwa hata eseminaariyu. Owo mwiiriirya. Khonsuweliwa ni osoma, ni teologiya. Owo mwiiriirya waipithihiwe okhuma wopattuxiwani w'olumwenku, olipelelaka wooniheriwa w'ana a Muluku.

19 Mukileele, munn'aka mulopwana, mukileele, munn'aka muthiyana, okathi xeeni waari wira aana a Muluku yooniheriwe ohikhanle okathi ula vano? Ti liini otonko aya okhala okathi mwa wahala, awo yaarow'aya wooniherya okathi wo ovuluxa muxovo wothene? Ephattu, ephattu ene enimwiipulela, elipelelaka okathi wo wooniheriwa. Vano, ehinatthi opakiwa ettipihelo, Eroho Yowarya ehinatthi hata omwaraxiwa, sihinatthi sothene—Waataana Wa Khalayi wothene, ottuli wu, khiwaakhanle ookhalaka wooniheriwa. Waahana olipelela mpakha okathi ula. Vano ithu sothene sooruhiwa, sirw'aka, sikhhalaka mpakha nliku noomaliherya, wooniheriwa w'ana a Muluku onootthika, nto Eroho ya Muluku enikela mwa athu ala, orateenexa, mpakha muteko aya onrowa okhala woolikanexa ni wa Kristu onrow'aya otakaniha Owo ni Ekereja Awe vamosa.

20 Akavi atonko osoma ehantisi ya ipiraamite? Kinoona wira khino muhano mmosa va oovenxa ntata nawe. Vaareera.

21 Muluku aalempe aBibilia araru. Mmosa a yaawo aari Sotiiyako osulu, owo ti Bibilia oopacerya. Mutthu aarowa owehaka osulu wira osuwele wira Muluku t'osulu. Mmutthare Sotiiyako, mootoko omusoma? Owo onnihimya hata khula okathi, hata okathi wa kankuru. Owo onnihimya epecerelo, yopa-...oyariwa wa Kristu. T'evi ekhanle elatarato yoopacerya mwa Sotiiyako? Harusi. T'evi ekhanle elatarato yookiserya? Leo kharamu. Orwa woopcerya ni Orwa wa nenli wa Kristu, wothene owo ti woolempwa mmo.

22 Vano Bibilia oottharelana aalempwe, vaari vanlukuni, niihaniwa "ipiraamite." Muluku aamulempe mupiraamiteni. Nyuwo mwasoma iyo, nwehe ihantisi sa khalayi ni ikhotto, moota saatekiw'aya ohinatthi wiiraneya ohonona wa mutaseke.

23 Aneeraru olempe vapapheloni, Bibilia, wa olumwenku, muulupale woosuwela ni woosoma waarowa orwa. Vano, okathi Muluku oneett'awe movirani m'okathi, hiyo nri mwa Leo kharamu. Hiyo nri woomalihani w'epiraamite. Nri muLiivuruni mwa Wiisuupulula, ekapiitulu yookiserya. Siensiya onihimya wira nri minuutu miraru ohinatthi ophiya ohiyu eriyari. Oh, nkuupuwelani vatthu vary'ahu.

24 Ni nwehe, nrowe nikuxe epiraamite, ti yookhweya. Epakiwe ntoko etriyankulu.

25 Okathi waary'ahu va opacerya okathi w'oxaka wa ekereja, nuumala Orehererya okathi wa Lutero, mutthu ohimya paahi wira aari muKristu, yaahimya ekumi awe ahiiso okhwa. Awo yaanimwiwa hata mwaha w'ohimya wira aari muKristu. Tivo ovira molupatthiwani...Khula okathi, mwa khula okathi, onnikhalaka olupatthiwa. "Othene ale ankhala vooreera murima mwa Kristu Yesu anoolupatthiwa." Okathi wa Lutero, yaari yo woopiha ohimya wira "Luteraano." Mooniwa ntoko namathipelela, ni vaaniweryaneya wiiviwa. Imaara sinci-ene awo yaawiwa mmaripuni, yaamwaapaha, n'itthu sothene sikina, mwaha w'okhala aLuteraano.

26 Vano ekereja khukhala yoothokolowa, ntoko epiraamite. Eyo khuphiyerya nivalo nikina na mahala, waari oreerihiwa. Okathi wa Wesley, owo aavaanyihaly'awe ekereja Anklikana, khwiixutthiha oreerihiwa. Khuphiyerya-tho mooyevani, vano awo yihaniwa nikhuru n'anamathipelela.

27 Akavi mu yaari aMetotista, wala yaakhalaka, wala atonko oluttana ni ekereja Metotista? Nuusu na nyuwo. Mwaanisuwela wira ekereja Metotista yaahalela okhalana Eroho Yowarya okathi uwo? Miyo kinnirowaka ikereja Metotista ni owoona emorelaka vathi, n'umwaraxela maasi owiitho waya ni waavekhulela nnivekhulelo, okhottiherya Eroho Yowarya waarweela. Eyo ekeekhaii. Vano, eyo ekeekhaii, ohitto omiyaakoni s'oKentucky weiwo waarin'ahu aMetotista. Nyuwo amiravo mw'ale muniitakanxa mukereja nno. Hiyo



naahikhalana aMetotista wu, ni aPatista. Naamurowa okokhoro waltaari n'umanana mmakhatani mmosa ni mukhw'awe mpakha waakhela etthu. Naamukhuma, naakhalana makhalelo oovirikana nuumala yeeyo.

<sup>28</sup> Masi nyuwo munimoorwa paahi n'uhela nsina nanyu muliivuruni ni wira, “Miyo ka Mmetotista.” Nto munikuxa esuupha ya maakha n'umwaraxeliwa maasi vakhani mwa nyuwo, vano ti yeeyo tu. N'ukhuma ni waawara akaputtula, wiipintari, omuttikha musewe a ikhavalu sinxintana, omuttikha cuuku, n'umuttikha musewe a maakina a musurukhu n'itthu sothene sikina, nlelo aMetotista ooreera murima, moone. Owo kuhiyo Mmetotista. Awo t'alipa-oowitakanxa mukereja paahi. Eyo ekeekhaii. Patista, enamuna emosaru, Prespiteriyaano, erowaka siiso.

<sup>29</sup> Ntoko David duPlessis iiraly'awe, “Axisulu, Muluku khorina hata axisulu.” Muluku khonakhalaneke musulu awe. Owo orina aana, kahi axisulu. Eyo ekeekhaii. Nyuwo. .nto atthu ankela mukereja Metotista, wala mukereja Pentekosite, wala mukereja Patista, mwaha wo wira ame anyu wala atithi anyu yaari muPentekosite wala muPatista, nto nyuwo mwa musulu. Awo yaari aana. Nyuwo mwa musulu, moone. Tivo Muluku khorina hat'etthu siiso. Ekereja khereerane yeeyo, masi kahi—masi kahi e—kahi e—kahi . . . Muluku khorina.

<sup>30</sup> Vano, nwehe iya, sirowaka siiso mpakha vamphiy'aya vano, okathi vanikhal'aya yoovukuwa, ekereja. Okathi wa Pentekosite khukela. Owo vekeekhai woothikila ikumulanelo sinci-ene. Vano exeeni yiiraly'aya? Eyo yaahin'ye Metotista ni Luterano othene ottuli.

<sup>31</sup> Vano Eroho Yowarya eheetta khukhuma ehiyaka okathi wa Pentekosite. Awo yiirale exeenii? Awo aroothhokiha, khwiipaka mmansaya, “Hiyo na Asempeleya de Deus. Hiyo na Unisista. Hiyo na Dualista. Hiyo na ekereja ya Muluku. Hiyo na *ela*, wala *ele*. Khamuniira mpantta, khamukhanle ookelaka Wirimu vahikhanle wira murina nsina nanyu muliivuruni mwahu.” Oh, ethiru iyo! Nkincala sinto nyuwo mwa muPatista, Mmetotista, Prespiteriyaano, nyuwo muhenle nsina nanyu muLiivuruni mw'Ekumi okathi Muluku ohenly'awe-mo. Vakhalaru wira muroothhomeliwa Ekumi Ehinimala, Muluku onoowiihanani mwa enamuna emosa, enamuna khata, emosa—enamuna emosa wala ekina. Vekeekhai Owo onimwiira. “Othene ale Atithi akivahaly'aya animoorwa wa Miyo.” Hata wira aniira mpantta wa ekereja xeeni, eyo kherina naata n'iyoy. Masi muromolelo khunrowa owiirihani hata etthu emosa, masi onoowerya wookhottiheryani vanci-ene okelela ohoolo ni Muluku, masi owo—owo khunrowa-tho wira hat'etthu. Onimoothukumanyani nyuwo vamosa nnikhuru n'alipa-oowaamini ni oohaamini. Vekeekhai, muniphwanya yeeyo mapuro othene onrow'anyu, ni yaahikhalana yeeyo hata Wirimu. Tivo, vaareera, masi

muniweha muromolelo anyu. Nwehe wa Yesu, Owo t'okhanle Ole oomuweha.

<sup>32</sup> Vano nirwaaka nikhuruwelaka va . . . awo yaahikhalana . . . Akavi . . . Kookupali wira muthiyan'ola va oovenxa ntata, wira mwaahisoma ipiraamite. Nyuwo moosuwela, epiraamite khiyaatonko omaliheriwa. Yaahimaliheriwa? Khenakhalaneke nluku noomaliherya nooheliwa vasulu vaya. Awo nnakhala, khanaweryeke hata ophwanya. Awo khansuwela etthu ekhumelenle ni nenlo. Mwaha wa xeeni? Xeeni nluku noomaliherya nihiheliw'aya vasulu vaya, nluku nuulupalexa, vasulu vaya? Okhala wira Owo aahikhottiwa okathi orwiiy'awe. Owo aari Nluku nle nookhoottiwa. Eyo ekeekhaii. Masi enoorowa omaliheriwa. Eyo ekeekhaii. Vano nto maluku ale anlikanela mukerekhere wa Nluku nle nuulupale, ahaana okhala maluku anrowa okhala oolattana voomalelaxa ni Nluku nenlo, anrowa olikanela ni nenlo, nikumano ni othene—mapuro othene. Epiraamite ti yoolikana saana vahinweryaney'aya oviriha elaamina eriyari aya, vaavo maluku ale amphan'aya. Muteko mmosa w'ofunti wooreera. Kamosa-kamosa yaanilemela itonelaata imiya sene osulu musulu, ni soophitanihiwa oratteene.

<sup>33</sup> Ti siiso Muluku oniruuh'awe Ekereja Awe. Hiyo nri oolikanela vamosa, murima mmosa mwiiwanano mmosa. Vano mutthu oniira, "Ahe, aLuteraano ottuli wu khayaarina etthu." Muhaamini. aLuteraano anookhumelela woohihimuwani siiso ntoko akina anrow'aya okhumelela woohihimuwani. aPatista, maPrespiteriyaano, ni aana othene a Muluku, anookhumelela woohihimuwani iwe. Nto tivo atthu olelo aniiw'aya, "Oh, ahe, onookhala muhakalaliho onrowa okhuma nno owoopole aPentekosite imilyawu emiya. Othene aya anrowa woopowa nto onookhala Okuxiwa." Moowokiwa. Okuxiwa iwo onrowa okhala ikonto imiya sene, eyo ekeekhaii, masi anrowa okhala w'ale mwa iyaakha ikonto thanu na mosa sa woopoliwa nave, okhuma iyaakha ikonto thanu na mosa. Mutthu oneetta moWaaryani okathi Waarya iwo onoorw'aya wa yoowo, onlapuwa mithato okathi oniphiiyery'awe seiyo. Vano, owo akhootta-ru Yoowo, nto onihiiwa mw'epiphini. Masi owo akhala okelelaka ohoolo!

<sup>34</sup> Vano, nwehe, nto Orwa wa Pwiya Yesu ori vakhiviru saana mpakha Eroho okhuma vathi muhina mu . . . okhalihwiwa naxariya paahi, oreerihiwa, opatiiso wa Eroho Yowarya, nto vano ophiyaka okathi ene yoowo wo orwa wa Nluku nuulupale. Ekereja ehaana okhala yooloka oratteene ntoko Kristu mpakha vanweryaney'aya Kristu ni Ekereja okhala vamosa, Eroho emosaru. Vano Eroho ya Kristu yakhala mwa nyuwo, Eyo eniwiirihani okhalana makhalelo a Kristu, otthara makhalelo a Kristu, ovara miteko sa Kristu. "Ole onikaamini Miyo, miteko sinvar'aka owo onoovara nave." Yesu oohimya yeeyo. Munnona? Vano ninrowa okhalana, nookhalana muteko onoorwa

ori woolikana oratteene ntoko ekumi ya Kristu. Mutek'owo onsuweliha exeeni? Orwa w'Apwiya.

<sup>35</sup> Nkawehani yeeyo molumwenkuni ololo, nto nwehe etthu Khrushchev enihim'yawe, itthu iya sikina sothene suulupale, ni ikhotto suulupale sa molumwenkuni vakhiviru, khula okathi, vaamuweryaneya okhala otthu esekuntu t'isekuntu. Eyo ekeekhaii. Nto vakhala wira eyo, hiyo noosuwela wira eyo eri vakhiviru. Khula mutthu onuupuwela onniwerya osoma muxornaaleni wala omwiiwa raatiyu, khusuwela wira eyo eri vakhiviru. Ahe, muupuwele, Kristu onrweela Ekereja Awe eyo ehinatthi wiiraneya. Okhuveela xeeni ory'aya Orwa wa Pwiya Yesu? Khino muthukuman'ola ohinatthi omala ohiy'ula. Hiyo nri okathi wookiserya. Vekeekhai ti siiso.

<sup>36</sup> Nwehe ekereja moota enoor'aya, moota eneett'aya. Mukuxe yeeyo mmuruni mwanu paahi, nyuwo alipa-oolepa ihantisi munisoma ihantisi. Nkawehani ekereja Luteraana vathi va okhalihwa naxariya, emalakarū okhuma mw'Ekatolika, nkawehani yeetaka. Vano nkanweheni Wesley orwaaka vakhiviruxa, mwa oreerihwa, etthavanaka mwa Soolempwa. Nkawehani saana eriyari aya, Wesley. Vano etthu yaakenle voottharelana waari okathi wa Pentekosite. Vano okathi wa Pentekosite ni wuuluuliwa wa soovaha, soovaha sa erooho. Vano, nkawehani okathi onoorwa vano ophiyaka Nluku nuulupale. Munnoona enihim'yaka? Orwa w'Apwiya, wiisuweliha. Muluku ni soopattuxiwa sothene anwehererya ekereja ophwanya okhala waya wopuroni.

<sup>37</sup> Mulattu ene ololo, miyo...voohalaka okhala atthu othene kinkumanan'aka. Miyo kaahikumihiriwa ota, hiyo naakuxa...kihaana owehawehiwa mw'erutthuni, moosuwela, naarowaka ilapo s'okhopela, nyuwo arummwa n'akina munnisuwela eyo. Okathi waawehawehiw'aka kaahikumihiriwa musaala mme, miyo kiira kiwuryaka ele ya khalayi...wa miyo yaakhala ntoko exima, wala oruttutthu, wala etthu siiso, nto miyo—miyo kaahaana okhala kiwuryaka. Vano khukhumela vate vale, khukilaathi, khulipelela ewoora nuusu ni woona sinto yaamukhuma munipwiiwini mwaka wala nnari. Miyo khuwehawehe vale, nto aahikhala mwaamuthiyana mmosa, aakhala ntoko aahalela okhwa. Oowo aari oo...metto sikhaani ni miyoono sikhaani. Ni miyo khukhala kirowaka okhuma mutth'ula kimurowelaka ole, mutth'ula kimurowelaka ole, kimwaattamelaka mthiyan'owo, mpakha ophiya nipuro vaary'awe-vo. Aakhala ntoko namuhaawi aahalela okhwa. Vano miyo khurōwa vakhiviru ni yoowo, miyo khwira, “Mukilevelele, muhano.”

Owo khwira, “Ehaali anyu?” Oh, owo khaareere owereiwa!

Nto miyo khwira, “Exeeni ehilonke?”

38 Owo khwira, “Kaaronwe oTucson omuxekurya mwan’aka mwaamuthiyana. Khunawereiwa, awo khanwerya ophwanya exeeni ehilonke.”

39 Miyo khwira, “Etthu emosa kintthun’aka wookohani.” Miyo khwira, “Miyo ka mulaleyi a Ehapari yooreera. Nyuwo mwa muKristu? Nyuwo moolikana wira murowe okathi ule waphiya-ru?”

Vano owo khwira, “Miyo kiniira mpantta wa ekereja *khata-khata*.”

40 Miyo khwira, “Kahi yeeyo kookohaly’akani. Nyuwo mwa muKristu osareiyi Eroho ya Muluku ni moolikana wira murowe Owo awiihanani vale?” Muthiyan’owo hata khaasuwela etthu kaahimy’aka. Munnona? Oh, mukhalelo xeeni wookhupanyereya olumwenku ory’aya-mo!

41 Vano, “oonisuweliha miiriirya s’otthuna Wawe,” orwa... Mukihiye koosomeleni etthu. Miyo kaamusoma va... Nrowe nikhunle vano va “mwiiriirya w’otthuna Wawe.” Nrowe nikhunle mwa aHeperi mu minuutu mmosa paahi, ekapiitulu 7 y’aHeperi, kookupali wira ti yeeyo. Nto kaatthuna koosomeleni etthu emosa yaarowa owoonihani oreera saana okathi onuupuwel’ahu nikilante-ene vamosa mapuro a Wirimu. aHeperi, ekapiitulu 7.

*Okhala wira Melikhiseteki ula, (vano nwehe) mwene a oSalemi, namukuttho a Muluku wirimu-rimu, . . .*

42 Mwiiriirya ene t’uvi vano? Va t’uri mwiiriirya, nwehe ela. T’ani Mutthu ula, “okhalihaka, osuwelaka, mwiiriirya w’otthuna Wawe,” Melikhiseteki ula? Miyo kinaalipelela atthu othene va, anaakhunla aBibilia nlelo. aHeperi, ekapiitulu 7, Paulo alavulaka, mulopwana yoowo a Kalasiya.

*Okhala wira Melikhiseteki ula, mwene a oSalemi, namukuttho a Muluku wirimu-rimu, . . . aaronwe okumana ni Abrahamu okathi aahokolow’awe waawiiv’awe mamwene ni khumureeriha;*

*Yoowo Abrahamu aanvahaly’awe epantte, epantte ya namuloko ya itthu sothene; opacerya wene nnihimya, nnihimya Mwene a exariya, . . . nnihimya-tho . . . Mwene a oSalemi, (T’ani Mutthu ene yoola?) yoowo okhanle, Mwene a exariya;*

*Owo khaarina tiithi awe, hata maam’awe, khaarina nloko nawe, khaarina hata opacerya wa mahiku, wala emalelo yekumi; . . .*

43 Mulopwan’ola aari Pani? Aari Pani Yoowo? Owo khonakhalaneke tiithi, Owo khonakhalaneke mai, Owo khonakhalaneke okathi opaceny’awe, wala khonakhalaneke okathi Owo onrow’awe okhwa. Owo aahikumana ni Abrahamu akhumaka waawiiv’awe mamwene. Owo iira exeenii? Owo

aarookhuma omuwowela Lothi, munn'awe aarimeenle, wira amuhokoloxe. Vano owo aahiwiiva mamwene; yaawo, mamwene ale yaawiiivaly'aya; kookupali wira mamwene muloko wala muloko n'athanu, ni omwene aya. Masi Abrahamu khwaatthokiha arumeyi awe khumurowela, khwiivalaanya ohiyu, moone, okathi waamuvanry'awe ohiyu. Oh, munna, hiyo ninvara muteko mw'epiphini vano, Waarya omosa orin'ahu paahi ti Waarya wa Ehapari yooreera. Masi owo aahiivalaanya, khunvara khimuhokoloxa. Vano ahokolowaka, vaamanly'aya ekhotto!

44 Nrowe mwa Mapatthuwelo 14, minuutu mmosa paahi, wira noone echantisi ene voowooneyaxa. Nirowe va mwa Maphattuwo, muloko-. . . kookupali wira ti 14, Maphattuwo 14. Ayo, nrowe nikuxe Maphattuwo 14:18, nipacerye. Nrowe nipacerye vakhani ehinatthi yeeyo. Nrowe nipacerye, ayo, eversiikulu 18, Maphattuwo 14:18, "Vano Melikhiseteki. . ." Vano, owo ti Abrahamu ahokolowaka vano waawiiiv'awe mamwene. Aamutthika, atthikaka, amuhokoloxaka Lothi, atthu othene awo yaakunx'aya. Othene!

45 Ntoko Davidi, aaronwe khukuxa. . . Exeeni Davidi iiraly'awe? Aamukunxe pharancikula mwaamukhaani, khurwa khunvara mwaapwittipwitthi mwaano mwa kharamu. Nkamuupuweleni pharancikula, omuwowelaka mwaapwittipwitthi. T'ani aarowa wira yeeyo? Mukileele mutthu xeeni mu aarowa wira, nvenxe ntata. Kinimooleelani naanaanoru wira moovonya. Nyuwo khamukonne kivenxaka nawaka. Nnari, miyo nkaakhanle oorowelaka ni miloko miraru ni thanu na mosa, voorika. Masi owo aamurowenle ni pharancikula, nipattuuxa naamukhaani na esapala, ni mikhoyi miili, aamurukurerihaly'awe. Okhala wira. . . Nto vaphiyaly'aya okathi wa Koliyathi wiikuxererya, owo aahimurowela Koliyathi, nto owo khwira, "Muluku a Wirimu ookitthuniherya omoopola mwaapwittipwitthi mwaano mwa kharamu, mwaano mwa ekhaya." Owo aahisuwela wira khaari pharancikula. Waari owerya wa Muluku waaronwe n'uwo. Owo aari Ole aamuhokolonxe mwaapwittipwitthi.

46 Nto ti yeeyo hiyo enihimy'ahu olelo. Muluku ookhalana aDavidi anikhala vakhiviru, ayo, mulopwana, anlyiha ipwittipwitthi s'Atithi. Nto imaara kamosa-kamosa nnimoorwa nipothe, wala kankuru onimoorwa, wala etthu, nto enrowa otupha mmatatani mwa tothoro. Eyo khenrowa omweemexa Davidi uwo, owo onookhuma arowaka iwe omuwowela mwaapar'owo, ni pharancikula mwaamukhaani, a, "Nvekeleke etthu p'itthu mwa Nsina Naka, munoovahiwa." Nkincala, matothoro yatheya, ni atthu othene akina omuveeha, owo onoomurowela mwa khula enamuna, ohokoloxerye epwittipwitthi iyo munikhomani. Ayo, mulopwana. "Owo mwaana a Muluku, mukumihe ntata nanyu mwa yoowo!"

Khummoroxa kharam'ula, vano kharamu khuyenya, khunvara ireru sawe khumwiiva; mwammiravo mmosa ooxeerya, khino aarulela ikhiilu miloko miraru ni thanu na mosa wala miloko mixexe n'imoso.

<sup>47</sup> Nwehe. Melikhiseteki, Mwene a oSalemi yoowo okhanle Mwene a Murettele, yoowo vekeekhai Salemi oniphwanyaneya epantte ekina ya mwaako. Ti Mwene a oYerusalemu, aari Yoowo. Vekeekhai ti yeeyo Owo aary'awe, Mwene a oYerusalemu. Yoowo, Yerusalemu voopacerya wiihaniwa Salemi, waari murettele; owo aari Yerusalemu voopacerya, ohinatthi wiihaniwa Yerusalemu. Owo aari Mwene a oYerusalemu. Owo aari Mwene a exariya, Mwene a murettele, Mwene a oSalemi. Owo khaarina tiithi awe, khaarina mam'awe, Owo khaarina opacerya wa mahiku, Owo khaarina emalelo y'ekumi, Owo khaarina nloko nawe. Oh, oh, oh! Aari pani Mutth'ula? Nkanweheni Yoowo. Vamanly'aya ekhotto, vamanly'aya ophwanyiwa oxintta, nkawehani etthu Owo aahimaly'awe. "Nto Melikhiseteki," eversiiikulu 18, ekapiitulu 14, Maphattuwelo.

*Vano Melikhiseteki mwene a oSalemi aahiruwa ephawu n'iviinyu: tthiri owo aari namukuttho a Muluku a wirimu-rimu.*

*Nto owo aahimureeriha, iiraka, Mureerihiwe nyuwo Abrahamu a Muluku a wirimu-rimu, mpattuxa erimu n'ilapo ya vathi:*

*Attotopeliwe Muluku a wirimu-rimu, yoowo aavaherenrye awanan'inyu mmatatani mwanju. Vano owo aahinvaha ya namuloko ya itthu sothene.*

<sup>48</sup> Nrowe nisome-tho ohoolo waya vakhani.

*Vano mwene a oSotoma aahimuhimeerya Abrahamu wira, Mukivahe atthu, vano nyuwo muhalaneke mihakhu.*

*Abrahamu aahimwaakhula mwene a oSotoma wira, miyo kihaavenxerya ntata naka APWIYA, Muluku a wirimu-rimu, mpattuxa erimu n'ilapo ya vathi, (Mwiiwe moota owo ovukunly'awe yeeyo, hum, moota aamuhimenry'awe owo!)*

*Wira nkinkuxa hata nliinya nnakhala mukhoyi wa ixapattho, ni wira nkinkuxa hat'etthu emosa, nnakhala etthu emosa...ni khamunwerya ohimya wira, iye sirin'anyu, wira nyuwo muhihimye wira, Miyo koomuthaaciriha Abrahamu:*

*Ohiya iye amiravo aka silyiy'aya, . . .*

<sup>49</sup> Nkanweheni Melikhiseteki ula vamanly'awe okumana ni Abrahamu akhumaka waawiiv'awe mamwene. Mwiiiriirywa wa Muluku vano onosuweliihiwa! Aari Pani Uwo? Khaavo. . . Awo khanwerya ophwanyia ehantisi Awe, okhala wira Owo khaarina

hata tiithi awe, Owo khaarina maam'awe, Owo khonakhalaneke hata okathi waapacenry'awe, Owo khonakhalaneke hata okathi aatonko awe okhwa, tivo onakhaleru Pani nlelo mukumii. Owo khonakhalaneke epacerelo, tivo khivaaweryaneya Owo okhala mutthu mukina woohikhala El, Elah, Elohim; ole okhanle mmansawe, ole onkhala meekh'awe, Muluku Oowerya sothene!

50 Yesu aahikhalana Tithi, Yesu aahikhalana maama; Yesu aahikhalana epacerelo ya mahiku, Yesu aahikhalana emalelo y'ekumi ya vathi. Masi Mutth'ula khaarina hata tiithi nnakhala maama, amen, hata tiithi nnakhala maama. Yesu aahikhalana oowanli Tithi ni maama. Mutth'ula khaarina hata tiithi nnakhala maama. Amen. Nto Owo aairale exeenii, nuumala ekhotto, nuumala Abrahamu okuxa opuro awe?

51 Ekereja nuumala okuxa opuro aya, hiyo ninihaneliwa okhalihiwa aana, ni Eroho Yowarya. Nto okathi khula mutthu onikux'awe opuro awe, ele Muluku emwiihanenly'awe wira avare, n'ukhala oolipa mpakha woomalelani w'ephiro, aarowelaka ale arimeenle.

52 Yoopacerya, Paulo onikumihwa woova wothene mwa yeeyo, tivo vano, "Nyuwo mwaihaniwa, mwaahikhale oowuukhuwa mmuupuweloni mwanyu ni enamuna emosa ya teologiya; vekeekhai mwaayariwe-ne ni Eroho, vano Muluku ootthommeni ohinatthi opattuxiwa olumwenku, khuhela nsina nanyu muLiivuruni mw'Ekumi ya Mwaapwittipwitthi, nto vano hiyo nnoorwa vamosa okilaathi mapuro a Wirimu mwa Kristu Yesu. Athu oowaarya, nloko n'athu oowaarya, athu awawe, nloko n'anamukuttho oomwene, ninvahaka mukuttho wa erooho Muluku, eyo p'iyoy, muhokorokho wa iyano sahu sinttotopela Nsina Nawe."

53 Athu anookela ni wira, "Athu ale aavahuwa." Vekeekhai awo aavahuwa; ankhili a Muluku ololo vamaithoni v'athu, nto ankhili a mutthu ololo vamaithoni va Muluku. Awo t'ovirikana, emosa ni ekhwaaya.

54 Masi ekereja y'ekeekhai yoosareya Eroho, yoosareya owerya wa Muluku, ekilanthe vamosa mapuro a Wirimu, envaha mikuttho sa erooho, omuttotopela Muluku, Eroho Yowarya yeettaka eriyari aya, elamulaka etampi ni ekumiheryaka itthu siri eriyari aya sikhhanle soovonyeya, yookololiwaka ni ekhalihiwaka yoowooneya mwa mukhalelo. Mwaha wa xeeni? Okathi wothene Ohoolo wa Muluku woohkhala Mukutth'ole woosareya ephome.

55 Vano muupuwele, hiyo noovira mwa yeeyo voosiis'ula. Nyuwo khamoopoliwe ni Ephome, *munikhalihwiwa* oowoopowa ni Ephome. Masi moopoliwe ni mahala, mwaha wo waamini, mwaaminiki Yaawo. Muluku oroomana murim'anyu okhala wira Owo ohootthomani. Nyuwo khuweha osulu khwaamini, khikupali. Vano Ephome enipaka ettipiheryo itampi sanyu.

Muupuwele, miyo koohimya wira, “Muluku khommulamula natampi mwaha wo wira etampi.” Owo natampii opacerya wene. Owo onimulamula muKristu mwaha wo wira etampi. Vano nto okhala wira Owo oomulamula, Kristu ookuxa olamuliwa wahu. Tivo khiivo ehukhumu w’ale ari mwa Kristu Yesu, ahineettela sintthun’aya erutthu, masi aneettela sintthun’aya Eroho. Nto nyuwo mwaira etthu yoovonyeya, khamuniira mwayini. Khamuniira etampi mwayini. Mutthu oniira etampi mwayini, onkhuma ni wira etampi mwayini, khonakeleke mw’Erutthuni mmo nlelo. Masi vammal’awe mutthu okhala mmo, owo ohookhwa, vano ekumi awe ti yoosukiwa mwa Muluku, vamosa ni Kristu, ootthittiwa ni Eroho Yowarya, nto xetwani khonwerya omuphwanya, owo ori mpuwa mme saana. Owo ohaana okhuma mme xetwani ohinatoko onvara. “Okhala wira muhookhwa!”

<sup>56</sup> Mmuleele mutthu okhwiye wira owo namirima miili moone etthu enkhumelela. Munvahe mukhutaape mwiire, “nyuwo namirima miili a khalayi, nyuwo,” owo khonihimya hata nuulumo. Nto eyo ekeekhaii, owo onookhala vale paahi.

<sup>57</sup> Vano mutthu okhwiye mwa Kristu, nyuwo munoowerya omwiihana namirima miili, omwiihana khula etthu munthun’anyu, owo khonrowa ovenya mwaha wa yeeyo. Yakhala etthu, owo onoorowa nipuro nimosa oovekeleleni. Ti yeeyo. Masi, oh, akina w’awo khareere okhala akumi. Ti yeeyo enuupuwel’aka, nihaana waavitha atthu ookhwa. Ale akhwiye mwa Kristu, hiyo ninaavitha mmaasini. Imara sikina ninaavitha atthu anci-ene akumi, elavilavi yinci-ene ni onyakulihana, ni khasireere mukereja. Masi khanikhanle oovalanya seiyo, masi Muluku t’oniira. Owo onnaasuwela atthu Awe. Owo onnisuwela ipwittipwitthi Sawe. Owo onnisuwela khula nsu. Owo onnaasuwela an’Awe. Owo onnimusuwela pani okhanly’awe oomwiihanaka, Owo onnimusuwela t’ani omutthomaly’awe. Owo onnimusuwela t’ani omuvahaly’awe itthu iya, mwa pani Owo onniisuwelih’awe Mmansawe. Moota Owo. . . Muluku onniwerya waaromela an’Awe, mwa etthu yo wira, osuwelaka wira awo animwiira oratteene.

<sup>58</sup> Munnaamini wira Muluku onniira yeeyo? Vano, Satana aahimuhimeerya yo—Yobi nihiku nimosa. . . aahimuhimeerya Muluku nihiku nimosa, “Ayo, Nyuwo mookhalana murumeyi.”

<sup>59</sup> Muluku khwira, “Khaavo elapo ya vathi onlikana ni yoowo. Owo mutthu ooreera murima voomalela.” Aanimuroromela owo.

<sup>60</sup> Satana khwira, “Oh, ayo, owo ookhalana itthu sothene vookhweya. Mukihiye kimukuxe okathi vakhani kinoomwiiriha owo wootakhalihani owiitho Wanyu.”

<sup>61</sup> Owo khwira, “Owo ori mmatatani mwanyu, masi muhikuxe ekumi awe.” Munnona? Vano owo khumwiiriha sothene masi khuhikuxa ekumi awe.



62 Masi, oh, Yobi, ohiya o...owo iirale exeenii? Owo aahimutakhaliha Muluku okathi Muluku aakunx'awe an'awe, okathi owo aamwiirihaly'awe itthu iya sootakhala, ni sothene? Yobi khaakonhe. Owo aarimwiipopheya wiitho khukokhorela, aleluya, khwira, "Apwiya ti yaanivahale vano Apwiya t'akunxe, nttotopeliwe Nsina n'Apwiya!" Nyuwo muri vo.

63 Muluku aanisuwela ororomela Wawe mwa Yobi. Muluku onnisuwela eyaattelo xeeni Owo okhanly'awe woororomelakani. Owo onnisuwela eyaattelo xeeni okhanly'awe okiroromelaka miyo. Masi etthu enlavul'ahu vano omukhaliha mwaan'ola voopuroni.

64 Vano, okathi Bibilia...Ekhotto yamala-ru, itthu sothene samala-ru, vano exeeni enttharelana eniir'ahu? Exeeni eniir'ahu ekhotto yamala vale? Mwaanisuwela etthu eniir'ahu? Hiyo ninkumana ni Melikhiseteki. Nrowe nimukhunle Matewu 16:16, naanaanoru, noone yaari ekeekhai wala nnari. Matewu Oowaarya, ekapiitulu 16 ni eversiikulu 16. Nkireere okupali wira ti yoowo, Matewu 16:16. Matewu mulo-...Nnari, ti yoovonyeya, khiyaakhanle oolikanexa. 26:26. Oh, 16 va, Owo onlavula ni Simoni Petru; kileveleliwe, nkaatthuna ohimya yeeyo. 26:26, 'okhala wira olya wookiserya, ti yeeyo entthun'aka ophiyerya. Matewu, ekapiitulu 26 ni eversiikulu 26. Vano noophwanya, ela eri va, olya wookiserya.

*Nto elyaka Yesu aahikuxa mukatthe, khureeriha, khukawanya, khwaavaha awiixutti Awe, iiraka, Kuxakani, mukhuureke; ela erutthu aka.*

*Siiso-tho aahikuxa ekaalisi, khuxukhuru, khwaavaha, iiraka, Nwuryeke ela othene anyu;*

*Tthiri ela ephome aka yo waataana wa naanaano, yeeyo emwaraxeliwe atthu anci-ene wira eleveleliwe itampi (i-t-a-m-p-i, itampi, aKristu aniira itthu soovonyeya).*

65 Vaareera, "Masi—masi... " Nwiriyaane, eversiikulu 29.

*...Kinooleelani wira, okhuma olelo nkinwurya-tho eviinyu ila, mpakha nihiku onrow'aka owurya eviinyu esya ni nyuwo moomweneni mu'Atithi aka.*

66 Exeeni? Etthu emosaru yeeyo Melikhiseteki iiraly'awe Abrahamu nuumala okuxa opuro awe. Aatthokihale axilopwana awe, khuxintta ekhotto, vano aahirwa owaani, nto Melikhiseteki khukhuma ni ephawu n'eviinyu. Ekhotto nuumala, nto hiyo nnoorowa olya Niira n'Othela ni Pwiya Yesu molumwenkuni musya. Oh, nttotopeliwe Nsina n'Apwiya. Vaareera.

67 "Miiriirya s'otthuna Wawe, ntoko suupuwenly'awe vootthuna Wawe," nitthikelaka-tho vano mw'aEfeso, 9, "ntoko suupuwenly'awe Mwaneene."

*Wira waphiya omalela w'okathi...*

68 Nto muupuwele eyo, hiyo nnoomala-ru ovira wa yeeyo. aEfeso, ekapiitulu 1, eversiiikulu 10.

*Wira waphiya omalela w'okathi. . .*

69 Vano, hiyo nooxutta wira omalela w'okathi onlipelela exeeni? Omalela w'okathi wothene, okathi etampi enrow'aya omala, okathi okhwa onrow'aya omala, okathi iretta sinrow'aya omala, okathi etampi enrow'aya omala, okathi ohononeya wothene (itthu iyo sohononeya, xetwani ohononne awe) sinrow'aya omala, okathi ene mmansaya onrow'aya omala. Nwehe.

*Waphiya omalela w'okathi owo onrow'awe othukumanya. . . itthu sothene vamosa mwa Kritstu, sothene siri wirimu, n'iyе siri vathi; mwa yoowo:*

70 "Othukumanya itthu sothene mwa Kristu." Ntoko sihimaly'aka voosiis'ula, itathela sothene sikhaani nimphwany'ahu, itthu suulupale sikhaani, munoowerya orehererya mwa Maphattuwelo, munoowerya orehererya mwa Okhuma, munoowerya orehererya mwa Onamukuttho, ni oruuha mpakha wookiseryani, ni mwa Wiisuupulula simmalela akhalaka Yesu. Mmukuxe Yosefe, mmukuxe Abrahamu, mmukuxe Isakhi, mmukuxe Yakope, mmukuxe Davidi, mukuxe khula emosa wa itathela iyo, atthu awo a Muluku, nto moone vakhala wira khamunimoona Yesu iisooniheryaka mwa khula mmosa a awo. "Wira Owo athukumanye itthu sothene mwa Mmosa, Kristu Yesu."

71 Vano, ohoolo vakhani vano, vano eversiiikulu 11.

*Mwa yoowo nihaakhela yoorithi. . .*

72 Oh, "yoorithi." Mutthu ohaana woohiyeryani etthu, wira murithi. Eyo ekeekhahi? Yoorithi! Yoorithi xeeni hiyo erin'ahu? Yoorithi xeeni kaarin'aka? Nkaarina hata emosa. Masi Muluku khukihyerya yoorithi okathi Owo ohenly'awe nsina naka muLiivuruni mw'Ekumi ya Mwaapwittipwitthi ohinatthi opattuxiwa olumwenku.

73 Oh, nyuwo muniira, "Vano, mulipelele minuutu mmosa, munna, Yesu ohiira yeeyo okathi Owo ookhwenly'aweni." Nnari, Owo khonatoko. Yesu orwiiye okithumela yoorithi iyo miyo. Musome eversiiikulu enttha- . . . eliinya enttharelana.

*Mwa yoowo hiyo-tho nihaakhela yoowooneya. . . nihaakhela yoorithi, nootthommwa ntoko sintthun'awe ole ommaliherya itthu sothene ntoko sinuupuwel'awe ni sintthun'awe vooreera:*

74 Muluku, ohinatthi opattuxiwa olumwenku, ntoko soonaly'ahu niviraka muhina mwa nisomi, nyuwo atthu, ntoko soonaly'ahu wira Muluku aari ole okhanle mmansawe, moota mwa Yoowo waary'aya ophenta. Mwa Yoowo mwaari okhala Muluku; khiyaakhanle hat'etthu wira emukokhoreleke.

Mwa Yoowo mwaari okhala Tithi; yaahikhala...Owo aari Mmansawe. Mwa Yoowo mwaari okhala Moopoli; khiivo yaarimenle. Mwa Yoowo mwaari okhala Mpenuxa. Iyo ti mikhalelo Sawe. Khiyaakhanle hat'etthu vo. Tivo okhala Wawe Mmansawe, othuna Wawe Mwaneene waahikumiherya itthu iya, wira Owo mwa Mutth'ula, Kristu Yesu, athukumanye-tho sothene iya vamosa. Oh! "Niitho sihoonaly'aya, niyaru sihii..." Khivanxankiha okhalaka etthu ya mwiiriirya!

<sup>75</sup> Nkawehani, "oonitthomela yoorithi ila." Kaarine-ene ehaakhi yoorithi etthu, vakhala wira Muluku ommana murim'aka iiraka, "William Branham, Miyo koowiihanani khalayi, ohinathi opattuxiwa olumwenku, wira mulaleye Ehapari yooreera," Kookhalana yoorithi, yoorithi ya Ekumi Ehinimala. Vano, Muluku aamurumme Yesu wira akhalihe yoorithi iyo y'ekeekhai wa miyo, okhala wira khiyaakhanle hat'etthu khaakhanly'aka wiiraka wira—wira kirithi. Yaari siyo, yaari yoofayi, khiyaakhanle hat'etthu kaakhanly'aka wiiraka. Masi voomalelani w'okathi Muluku khimuruma, mwa okathi Awe woottuneya, Yesu Mwaapwittipwitthi, iiviwe okhuma woopattuxiwani w'olumwenku. Ephome Awe khumwaraxiwa wira kiwerye orowela yoorithi aka. Wira ekhale exeeni, yoorithi zeeni? Omwaana, wira kikhale mwaana a Muluku.

<sup>76</sup> Nto vano Ela pooti wooxankihani mpakha ohalela okhwa. Masi mwaanisuwela wira atthu ari aana a Muluku amuluku oosuwela vakhani? Akavi atonko osuwela yeeyo? Akavi ansuwela wira Yesu ohimnye siiso? Bibilia, Yesu oohimya wira, "Ikano sanyu khasihimnye, seiyo, wira nyuwo 'mw'amuluku'? Nto vakhala wira nyuwo muniwiihana amuluku..." Yeeyo, Muluku ohimaly'awe mwa Maphattuwelo 2 wira awo yaari amuluku, okhala wira yaari yaawo, awo yaahikhhalana emwene yoomalela vasulu v'emwene wa olumwenku. Owo aahinvaha mutthu emwene vasulu va itthu sothene. Vano owo khupwetexa omuluku awe, owo khupwetexa omwaana awe, owo khupwetexa emwene awe, nto Satana khukuxa. Masi, munna, hiyo ninlipelela wooniheriwa w'ana a Muluku anrowa otthika ekuxe-tho. Elipelelaka omalela w'okathi, okathi epiramite enrow'aya ovenya mpakha osulu, okathi aana oomalela a Muluku anrow'aya wooniheriwa, okathi owerya wa Muluku onrow'aya okhumela (aleluya) onrow'aya okumiha owerya wothene Satana orin'awe. Ayo, mulopwana, ti wawawe.

<sup>77</sup> Owo ti Logos waakhumme wa Muluku, eyo ekeekhaii, owo aari Mwaana a Muluku. Vano Owo khumukhalihani mutthu muluku ule mwaamukhaani. Nto Owo ohimnye wira, "Vakhala wira awo aniwiihana ale Masu a Muluku yaarwenly'aya, maprofeta, vakhala wira awo aniwiihana 'amuluku' ale yaarweenle Masu a Muluku..." Ni Muluku oohimnye siiso, Mwaneene, wira awo yaari amuluku. Owo aamuhimenrye Moise, "Miyo kihookhalihani muluku, vano

Aroni koomukhalaha profet'anyu." Amen. Wau! Khino kiniira ntoko natiini oomeekha, masi nkihiyo. Oh, vaweryaneya maitho anyu otthukuwa khoona itthu iyo. Vaareera. Owo aahimpaka mutthu okhala muluku, muluku moomweneni mwawe. Nto emwene awe enrowa okhuma ephareya mpakha ephareya, olimani mpakha olimani; owo ookhalana weettiherya wa yoowo.

78 Nto Yesu varwiyy'awe, ory'ene Muluku Mmosa oohikhalana etampi, Owo aahooniherya yeeyo. Okathi ittheke saarumaly'aya, Owo khwira, "Mmaale, mwiikhalele!" Amen. Nave okathi mwiri, Owo iirly'awe, "Ohikhale onlya mihokorokho s'awo."

79 "Vekeekhai, kinooleelani wira, nyuwo mukhanle amuluku axikhaani, mwairela mwaak'ola, 'othame vo,' muhioveryaka mmurwiani mwanyu, masi mwaaminiki wira ehimaly'anyu enimwiiraneya, munimwaakhela ehimaly'anyu."

80 Mutthikele mwa Maphattuwelo, wa ele yoopacerya, exeeni iyo? Vano olumwenku ni s'ephattu sinimwiipulela, sinlaka, itthu sothene sinimweetta. Exeeni? Wa wooniheriwa aana a Muluku, okathi aana eekeekhai, aana ooyariwa, aana oosarihiwa anlavl'aya vano nuulumo naya khwaakhuleliwa. Kinnaamini wira hiyo nri omukaanoni wa yeeyo naanaano va. Ayo, mulopwana. Wiirela mwaak'ola, ekhale siiso.

81 "Munna, miyo—miyo kintthuna *lexe ni lexe*, etthu khata wiiriwa. Miyo ka mulipa-oomwaamini Yesu Kristu."

82 "Miyo kinnoovahani mwa Nsina n'Apwiya Yesu Kristu." Amen. Wookhala wooniheriwa.

83 "Oh, munna, soohepha saka sinimoovya iwe. Nkaakhalanne epula."

84 "Kinimooveleliheryani epula, mwa Nsina n'Apwiya." Enimoorwa iwe. Oh, olipelela, wiipulela, itthu sothene sinlapelela wooniheriwa w'ana a Muluku. Muluku aahitthokiha wopaceryani. Owo aahinvaha emwene mutthu.

85 Owo khunvaha Yesu Kristu, nto Yesu khuvaha mwa Nsina Nawe, ni nrromel'ola, "Mwaavekele Atithi etthu p'itthu mwa Nsina Naka nto Miyo kinimwiira." Oh, Munna Palmer! Olipelela wooniheriwa w'ana a Muluku, opuro, ekereja!

86 Ntoko sihimaly'aka, Eliivuru y'aEfeso ti Eliivuru ya Yoxuwa, nto Yoxuwa aakhalihaka atthu nipuro nikhane nawaya. Vano, awo yaahikhale oomaala, vano owo aamuhela Efrayimi va, mmuttettheni mwa Manase, nto *ola* mmosa aamutthika anyakulaka uukhuwaka, anrowa okhalakhala sayi ekelelaka ohoolo? Okathi mmosa oniir'awe, "Miyo ka muPatista, miyo ka Mmetotista, miyo ka muPentekosite, miyo ka Unisista, miyo ka a Duidade, miyo *Fulani khata*."

87 Munrowa wira sayi? Mukhale oomaala! Muluku onttthuna okhalaha Ekereja Awe voopuroni, aana alopwana n'athiyana a Muluku. Muluku, akithuniherye okhala mukumi wira

koone, ti mavekelo aka. Vakhiviruxa mpakha vanihalel'aka owerya waapapela ni matat'aka, enikhala ntoko siiso. Eri vaavo vo. Ti yeeyo enweherery'aka woona, olipelela okathi weetta mphironi; vale ori nakhurakale ommaathale vale, okhuma mmirimani m'wame awe, "Nkirina eparatha nnakhala eweero." Oh, olipelela wooniheriwa w'ana a Muluku, aleluya, okathi Muluku onrow'awe wiisuweliha Mmansawe, okathi awo anrow'aya weemexa iretta, anro'waya omweemexa kankuru, anrow'aya weemexa iretta.

<sup>88</sup> Nyuwo munoona wira kankuru etthu? Bibilia ohimmye wira onoophiya okathi atthu anrow'aya wunttaka mw'erutthuni mwaya, vano amarepo anoorkhuura irutthu saya awo ehinatthi hata okhwa. Kankuru owereya wa niino nalikanyiha n'ile enoorwa. Masi, muupuwele, etthu ile yoowoopiha yaahikhottihiwa nihiku nle waakwannya ale yaarina Ekanyeryo ya Muluku. Ti yeeyo hiyo eniilipihery'ahu vano, okela n'ukhalihwa voopuroni Moomweneni mwa Muluku ihasara iya sootakhala sihinatthi orwa. Oh, moota ery'aya yoorera! Ophiya okathi, omalela w'okathi, yoorithi.

*Mwa yoowo hiyo-tho... nihaakhela... yoorithi,  
nootthommwa...*

<sup>89</sup> Nivahiwe sayi yoorithi ahu, mwa xeeni? Otthommwa. Otthoma osuwela khalayi ene. Muluku aasuwenle sayi wira aamuwerya wooromelani nyuwo okhala mulaleyi? Osuwela Wawe khalayi ene. "Kahi ole onththuna wala ole onththaya, wala ole...Ti Muluku onooniherya omoriwa ikharari." Ti yeeyo, otthoma. Owo aahisuwela etthu yaari mwa nyuwo. Owo aahisuwela etthu yaari mwa nyuwo hata muhinatthi orwa mulaponi. Owo aahisuwela etthu yaari mwa nyuwo ehinatthi okhala elapo wira murwe-mo. Owo—owo ti Yoowo. Owo ti Muluku oohimala, oohimala. Hiyo ninnimala, hiyo ninwerya wuupuwela voomala paahi.

<sup>90</sup> Eyo ennihimya voowaatta wa miyo, okhuma vakikhumelenly'aya yeeyo. Miyo nkisuwenle. Okathi onuupuwel'aka iwe, okathi weemenly'aka iwe okathi uwo vakhani w'otthapa, nto khuupuwela, "Khokhanle meelo." Khiwaakhanle hata nsana, khasikhanle hata iretta, khokhanle oxanka. Khokhanle otteeliwa murima vakhani, vano otteeliwa murima wunci-ene; wothene otteeliwa murima. Oh, wulu! Oh, okathi weemenly'aka iwe nto miyo khwira, "Exeeni ila?"

<sup>91</sup> Nsu nle khwira, "Ola mphento woomalela, ni sothene mutonko anyu ophenta ni sothene sitonko woophentani siri wenna ni nyuwo vano."

<sup>92</sup> "Vano nyuwo munoorowa onooniherya w'Apwiya Yesu okathi Awo anrw'aya, ntoko itthuvo sa muteko anyu." Kaahiwoona axithiyan'ale ooreera yeemenle-ne iwe, othene ekivaraka ekhuwelaka, "Munn'aka ooreerexa, oophentiwa!"

Kaahiwoona axilopwan'ale yaarina maihi siisa sa muxikoni mwaya, etthimakaka, ekivaraka yiiraka, "Munn'ihu oophentiwa!"

Vano miyo khuupuwela, "Enihimya exeeni yeela?"

Owo khwira, "Awo atthu anyu."

<sup>93</sup> Miyo khwira, "Atthu aka? Khiyaakhanle ookhalaka aBranham oowaatta siisaale, awo ari imilyawu sene."

<sup>94</sup> Owo khwira, "Awo atthu anyu arukunxale murima!" Aleluya. "Awo atthu anyu arukunxale murima. Awo t'ale a..." Khwira, "Munnimoona ole eemenle vale?" Muthiyana ootepa oreera kitonko aka omoona. Khwira, "Ole aahivikana iyaakha miloko mithanu na mixexe okathi omweettiheny'anyu wa Muluku. Khivanxankiha owo okhuwelaka, 'Munn'aka oophentiwa.'" Khwira, "Owo khonrowa-tho wuuluvala. Owo oovira mwa yeeyo. Owo ori mowaaryani w'emiravo. Owo eemenle va. Khokhanle oowuryaka maasi ooriirya, khomphavela awo. Khokhanle oorupaathiki wira orupe, 'okhala wira khonkhulumuwa. Khokhanle meelo, nnakhala nsana, hat'etthu. Hiyo nri mwa Ohimala vano. Masi nihiku nlo noovuwa Mwaana a Muluku onimoorwa, vano nyuwo munoophukiwa ettharihiwaka Masu mwaalaleny'anyu awo." Oh, munna!

Miyo khwira, "Paulo ohaana oruuha nikhuru nawe?"

"Ayo, mulopwana."

<sup>95</sup> Miyo khwira, "Miyo kilaleenrye Awo voolikaneene ntoko Paulo sihimal'awe. Miyo nkinahapuweke, nkinakuxeke hata iyaaminelo sa ekereja wala etthu p'itthu ekina. Miyo kikhlanle voolikana."

<sup>96</sup> Nto othene aya khukhuwela ni mwiiwanano mmosa, "Hiyo noosuwela eyo! Hiyo nimmumula ni nrromelo." Khwira, "Nyuwu munoorowa onooniherya wa Yoowo, vano nto ninrowa otthikela elapo ya vathi, wira nakhaleke mahiku othene." Oh, wulu!

<sup>97</sup> Okathi ene yoowo miyo khupacerya wiisuwela. Khuweha, kimmatahale-ene voolilini, khoona erutthu aka va yuuluvalaka ni ya mannyaari, ni yoophuraana ni-ni yoowereiwa ni yooxanka, vano khoona matat'aka waakohi waka, nto khuupuwela, "Oh, kihaana otthikela-tho mw'etthu ile?"

<sup>98</sup> Nto khukhala kiiwaka Nsu nenle, "Mutthikele mwiilipihaka! Mutthikele mwiilipihaka!"

<sup>99</sup> Miyo khwira, "Pwiya, miyo kweekwe kinnaamini ovoniha wa Muluku, kinootthikela kaaminiki. Masi kinimwiilipiha mwaha wa minepa iye, tivo mukikhaliherye. Miyo kinoorowa okhalana anci-ene iwe miyo...Mukitthuniherye kikhale mukumi, Pwiya, kinimwaahela emilyawu ekina mme, Nyuwu mwakitthuniherya-ru okhala mukumi paahi."

100 Khenikicala nikhuli xeeni, eyaaminelo xeeni, elapo xeeni, etthu awo akhanly'aya, awo othene ari mmosaru okathi amphiy'aya iwe, nto mikaano iye soovalaanya soomala. Oh, kinniwerya owoona axithiyā'ale, ooreera saana; kahaatonko aka owoona...yaaphiya vathi, maihi oorakama mpakha vathi ottuli waya. Isaaya soorakama mpakha vathi. Awo khiyaawanre etthu munawoni. Owoona axilopwan'ale ni maihi mpakha muxikoni mwaya, ooxeerya, ooriipa, ni makhwili othene oovirikana. Vano awo yaanikookolela miyoono saya. Miyo kaaniwerya owaapapela. Miyo kaahikwannya matat'aya. Muluku ti Mphuki aka, ni Eliivuru ila yoowaarya ekhunliwe. Kaaniwerya waakwannya siiso ntoko sinikwannya'aka matat'aka wiitho waka. Awo yaakookolela miyoono saya ekipatikhaka, hata etannyeyelo ya athiyana ntoko yaarow'aya okhala vano. Khenikicala moota mury'anyu ooreera murima, nyuwo mw'ani, muthinto xeeni wa mulaleyi nyuwo mukhanly'anyu, namukuttho wala etthu p'itthu mukhanly'anyu, khaavo hata mulopwana onwerya omuhiya muthiyana omupatikha, khuhikhalana etanyeyelo y'omutthu. Eyo ekeekhai yoolikana. Masi, munna, mwaviraru eriyari ya nno n'iwe, khenikhala siiso iwe. Oh, wulu! Ti yoo...Oh, yookhala...Ti yoohiweryaneyā. Yothene ophentaa. Sothene ti munna mulopwana eekeekhai ni sothene ti munna muthiyana eekeekhai. Khuuvo okhwa, hata oxanka, hata ehace, hat'etthu, khiivo ekhanle ookelaka iwe. Ti oreera woomalela paahi. Ti yeeyo eniilipihery'aka. Ti yeeyo enikhalih'aka.

101 Miyo khwira, "O Pwiya, ti yeeyo ekhalenly'aka va okereja, kitthunaka okhalihā ekereja oratteene." Kooleelakani nyuwo, munna mulopwana ni muthiyana, eri etthu emosa paahi ekhanle ookelaka mme, ophenta woomalela. Kahi mwaha wa nyuwo okhala oororomeleya oBranham Tabernacle, wala ekereja Metotista wala ekereja Patista. Iyo siri saana, muhaana okhala. Masi, oh, apatthani, muhaana...Kahi mwaha wo wira moolavula ilavulelo, muhiina mwa Eroho, mwaha wo wira moowoomola axetwani wala moothamiha miyaako ni waamini. Sothene iyo siri saana, okhala wira sothene siri saana, masi nlelo vahikhanle wira ophenta iwe woomalela ori muhina mmo. Eyo waari vaavo ophenta woomalela waary'aya. Nto eyo t'itthu emosa paahi enrowa woohiyani okela mme. Eyo t'itthu emosa paahi enwerya okhala iwe, ti etthu emosa paahi yaari, iwe. Oh, wulu! Ti okhalihwiwa mwaana. Muluku, ohinatthi opattuxiwa olumwenku.

102 Vano, nrowe naakuve, nrowe nikelele ekapiitulu ila emosa, khula enamuna, vaaweryaneyaka, minuutu miloko sintharelana.

*Mwa yoowo hiyo-tho nihaakhela yoorithi...  
(Hiyo ninrithi exeeni? Ekumi Ehinimala)...  
nootthommwa...*

Sayi? Atthu othene anniiwa saana yeeyo? Nyuwo moomwiihana Muluku? Nnari, Muluku t'owiihanneni. Atthu akina aniira, "Oh, miyo koomuphavela Muluku, ni koomuphavela Muluku."

Khamumphavenle. Khaavo mutthu otonko omuphavela Muluku. Ti Muluku onimphavela mutthu. Yesu ohimmye wira, "Khaavo onwerya orwa wa Miyo ehikhanle wira Atithi aka anoomuruuha toko." Moone, ti mukhalelo wa mutthu omutthyawa Muluku. Nto nyuwo muniira vano. . .

<sup>103</sup> Eyo, ti yeeyo enikihaaxa miyo, nave, wira koolaleeryeni nyuwo atthu; muhithipelele mukhalelo yoowo munikhal'anyu murowaka, murukunuwe vano! Mukiiwe miyo kaahimyaka, SIISO ANIHIMYA T'APWIYA. Miyo nkinatoko wiisiihana yeela, nkihiyo. Masi nyuwo munikiihana profeta anyu, wala profeta. Olumwenku onaamini yeeyo, olumwenku wothene, atthu imilyawu n'imilyawu n'imilyawu sene. Miyo kinnilavulaka n'atthu vohilukama muloko wala—atthu imilyawu muloko wala muloko ni piili, wala oovikana, kilavulaka ni yaawo. Kihona soowoona ikonto miloko sene ni ithoonyeryo ni mitikiniho, nave khuhikhala hata emosa etonko ovonyeya. Ni eyo ekeekhaii. Owo onnikileelaka khalayi ene itthu sihinavonyeyeke wiiraneya voolikane-ene. Miyo kinnimuruuha khula mutthu wira atthokelele yeeyo. Eyo ekeekhaii. Nkinihimya wira ka profeta, masi mukiwiriyaane.

<sup>104</sup> SIISO ANIHIMYA T'APWIYA, onrowa otthuneya ophenta woomalela wira wookhaliheni nipuro nle, okhala wira eyo ti yoothene yaari iwe. Nkincala hata musurukhu xeeni, miyooniheryo kavi sa etiini, miteko mikavi sooreera muvanry'anyu wala etthu p'itthu mwiiraly'anyu, eyo khenrowa ohimya etthu nihiku nlo. Onrowa otthuneya ophenta woomalela. Tivo ethu p'itthu muniir'anyu, muhiye sothene sikina mpakha mukhale oosareya saana ophenta wa Muluku mpakha vanwery'anyu waaphenta ale anoonyokhani.

<sup>105</sup> Miyo vekeekhai kiri ntoko sihimaly'aka voosiis'ula, kipakiwe, opakiwa waka wothene mahalaa. Atthu anciene aniira, "Vano, mukisune ottuli waka ni miyo kinoosuna wawinyu. Ayo, nyuwo mukiirele etthu ni miyo kinoowiirelani etthu nyuwo." Awo kahi mahala. Mahala t'ala, ottuli wanyu waaneenaka, miyo kinoosuna-wo khula enamuna, sinto munoosuna wawaka wala nnari; nyuwo mukimane wiitho, mwiire "ottuli waka onooneena-wo, wala, onthuna osuniwawo," miyo kinoosuna-wo. Munnona? Ti yeeyo, mwiire etthu. Miyo nkinaamini miteko. Miyo kinaamini wira miteko ophentaa. Miteko ti—miteko wooniheriwa wira mahala ahiiraneya. Miyo nkinikhala oororomeleya n'amwaar'aka mwaha wo wira kinaamini wira awo yaamukimwalana kahiirale, miyo kinikhala oororomeleya wa awo okhala wira kinaaphenta.



106 Miyo nkinlaleya Ehapari yooreera mwaha wo wira kinuupuwela wira kaamurowa omooroni kaahiire-ru, kinlaleya Ehapari yooreera mwaha wo wira kinnimpheenta Owo. Vekeekhai. Nyuwo munuupuwela wira kaamulapuwa iphareya iye sowoopiha, ni matteeke ale ettikinyeyaka ottuli n'uhoolo, ni overunya waaryaka, ni—ni itthu sothene sikina, ni khula minuutu voohalelaka...ni atthu othene ekhuwelaka, ni “aMutteeliwe Maria” ahimmwaka mmuttekeni, n'itthu sothene? Atthu ale ehakhinyeyaka musintuni mme sa nvarelelo, vano pilotu iiraka, “Kasoliina omphiyerya okhalatho minuutu muloko ni mithanu, khanisuwenle vary'ahu.” Munuupuwela wira kaamwiira yeeyo paahi—mwaha w'okisivela wira paahi? Huh! Munuupuwela wira kaamurowa iwe mutakhwani anatoropa a wAlemaanya vaatthuney'aya okihelela miyoono saya siisa sa khula ohiyu n'ukikeliha n'ukikumihwa vamuthukumanoni, mpakha Eroho Yowarya opacerya opaka miiriirya? Makomunista yiitthokihale-ene ni iteleskoopiyu s'ohiyu, wira ekoopele ekirakamenle-ene ekilomo emosa ni imeeturu imiya thanu na mosa. Munuupuwela wira kaamwiira yeeyo mwaha w'okisivela paahi? Okhala wira etthu emosa mwa miyo enniphenta; awo atthu Kristu aakhwenly'awe. Paulo ohimye wira, “Nkinthuna paahi orowa oYerusalemu, masi kinrowa iwe wira kakhomeliwe. Kinrowa wira kakhwe. Kinrowa iwe wira kakhwe mwaha w'Apwiya.” Eyo etthu, ophenta onokhanyereryani, oniwiirihani. Eyo vekeekhai ekhweeli.

107 Vaakhanle wira kaalaleya Ehapari yooreera mwaha wa musurukhu, vaakhanle siiso, nkaarowa okhala kilokihwaka itoolare ikonto imiya piili ohiy'ula, nkaarowa okhala moolokihwani mmo. Nnari, mulopwana. Okhala wira kaamwiira kisunke-ene kamosa—imilyawu kamosa-kamosa kinivahiwak'aka. Mulopwana mmosa, mulopwana mmosa aarumme anamuteko a F.B.I. ni exeeke ya itoolare emilyawu emosa ni ikonto imiya thanu. Nave miyo khwira, “Muttikihe.” Kahi mwaha wa musurukhu! Kahi musurukhu. Nkinlaleya Ehapari yooreera mwaha wa musurukhu. Kahi mwaha wa yeeyo!

108 Mwaha w'ophenta. Etthu entthun'aka wira, t'ila, kalapuwa-ru ephumu ile yookiserya mpakha iwe, siiso ekhalaka muhina mwa minuutu mithanu okhuma vano, siiso ekhalaka muhina mwa iwoora piili okhuma vano, siiso sikhalaka iyaakha miloko mithanu okhuma vano, nkisuwenle okathi enrow'aya okhala. Masi yakhalala vale, kiphiya iwe, kintthuna kooweheeni mowaarya w'emiravo, mutthimakaka, mukhuwelaka, “Munn'aka oophentiwa! Munn'aka!” Ti yeeyo eri mmurimani mwaka. Mwaha wa yeeyo. Nkineererya ovaanyihana ni nyuwo wira kikhale—kikhale oovirikana, masi kineeserya woohelani ephiro eri yooloka. Eyo t'inaumuna y'okela. Kahi

ekereja anyu, kahi muromolelo anyu, masi oyariwa wanyu mwa Kristu. Oh, wulu. Wau!

*Mwa yoowo . . . nihaakhela . . . yoorithi, nootthommwa ntoko sintthun'awe ole ommaliherya itthu sothene ntoko sinuupuwel'awe ni sintthun'awe:*

<sup>109</sup> Nwiryane. Nnoorowa omaliha muhina mwa minuutu vakhani. Nwiryane saana vano nihinatthi omaliha.

*Wira nikhale alipa oovuwiha nttittimiho nawe, hiyo nipacenrye omuroromela . . . Kristu.*

*Mwa yoowo nyuwo-tho omuroromenly'anyu, . . .*

<sup>110</sup> Nwehe ela vano, orateene. Nware ikhasako sanyu, ikhasako sa Ehapari yooreera. Mukhalihe maaru anyu ootthukuwa, nwiryane orateene. Kiri eversiikulu 13.

*Mwa yoowo nyuwo-tho omuroromenly'anyu, nuumala wiiwa . . .*

“Waamini onrwa ni . . .” [Muthukumano oniira, “Wiiwa.”—Mol.] “wiiwa ma . . .” [“Masu.”] “Masu a . . .” [“Muluku.”]

*. . . nuumala wiiwa masu a ekeekhai, . . .*

<sup>111</sup> Ekeekhai exeenii? Masu a Muluku. Eyo ekeekhai? Yohani 17:17, nyuwo munilepa Soolempwa, Yesu ohimnye wira, “Mwaareerihe, Tithi, mwa Ekeekhai. Masu Anyu Ekeekhaii.”

*. . . nuumala wiiwa ekeekhai, ehapari yooreera yo woopoliwa wanyu: . . .*

<sup>112</sup> Woopowa xeeni owo aatthun'awe waaleela? Othommwa ehinatthi opattuxiwa elapo (Eyo ekeekhaii?), wira nikhale aana, ootthomeliwa Ekumi Ehinimala. Vano, nuumala orwa mw'Ekumini Ehinimala, nuumala woopoliwa, oreerihiwa, osarihiwa Eroho Yowarya, nyuwo mw'ana. Vano Muluku onthuna wookhalihani voopuroni, oh, wira nwereyeke ovara muteko wa Omwene Awe ni ovuwa Wawe.

<sup>113</sup> Eyo Ehapari yooreera. Ekhalaka, yoopacerya, wiiwa Masu, “Murukunxe murima, mpatisiwe ni Nsina na Yesu Kristu wira muleveleliwe itampi.” Okumiha itampi sanyu sothene, wiihana Nsina na Pwiya Yesu Kristu, wa Muttetthe wa natiri. Natiri ta khula nawetta ori mphironi. Vakhala wira mukhumme owannyinyu ohiy'ula, natampi, mwiiraka, “Kinrowa oTapernakulu Branham,” Muluku onoovahani okathi ohiy'ula. Yookhala etthu eri eriyari ya nyuwo ni Muttetthe wa natiri. Muttetthe wa natiri exeenii? Eroho Yowarya. Etthu yaari eriyari ya Yoxuwa ni muttetthe wa natiri aari Yordani. Ekeekhai voolikane-ene.

<sup>114</sup> Moise, oryeene ethoonyeryo ya Kristu, aahiweettiha aana mpakha muttetthe wa natiri, vano Moise khaakelinhe aana mmuttettheni mwa natiri. Yoxuwa t'akelinhe athu khukawanya muttetthe. Yesu olinve esisapo, khuweettiherya

mwa Eroho Yowarya. Muluku oveleelinhe Eroho Yowarya ni Owo khukhaliha ekereja voopuroni oratteene, khula mutthu, amusarihaka ni Mukhalelo w'oMutthu Awe. Munnoona enihimy'aka? Sothene mwa Kristu Yesu, moota Muluku otthomenly'awe yeela mwa wiihana wa Ehapari yooreera ela!

115 Paulo, aKalasiya 1:8, oohimya, "Nakhala Nlaikha ninrwa nilaleyaka etthu ekina, atakhaliwe." Ekeekhai, Ehapari yooreera. Vano nwiriyane oratteene naasomaka, nimalihaka eversiikulu.

*...ehapari yooreera yo woopoliwa wanyu: mwa yoowo nave-tho... (nwiriyane oratteene)... nuumala waamini, mootthittiwa ni Eroho Yowarya yaalaiheriwe,*

116 Mahiku ookiserya, Bibilia ohimnye wira, vano nwehe, mahiku ookiserya sinoorowa okhala mixovo miili s'atthu. Mmosa wa seiyo onrowa okhalana Ekanyeryo ya Muluku, mukina ekanyeryo ya nxeni. Eyo ekeekhai? Akavi ansuwa yeeyo? Ahe, Ekanyeryo ya Muluku yakhala Ekanyeryo ya... Vakhala wira Ekanyeryo ya Muluku Eroho Yowarya, vano ohikhalana Eroho Yowarya ti ekanyeryo ya nxeni. Ni Bibilia ohimnye wira irooho soopiili saarowa okhala soolattana yaarow'aya owootha ale Oothanliwa vaakhale wira vaaniweryaneya. Khenrowa wira, okhala wira awo aathanleliwa Ekumi Ehinimala. Munnona?

117 Orowa okereja, eri ntoko osuwela wira aakhala aximwali aharusi muloko yaaronwe okumana n'Apwiya, othene ooreerihiwa, othene oowaarya, khula mmosa a yaawo ooreerihiwa. Athanu yaari oopisiha khuhiya mithuko saya sittiphaka. Athanu yaahikhalana makhura muxamaniyani mwaya. "Nto, moone Mutheli oophiya!" Vano athanu ale yaarina makhura muxamaniyani mwaya yaahirowa Oniirani w'Othela. Nto akina yaahiiwe ota weiwo waari wunla ni okhupanya n'ulumanyiha maino. Mukhale oolikana, okhala wira khamusuwenle minuutu xeeni Apwiya anrw'aya. Mukhalane... Makhura anthoonyerya exeeni mBibiliani? Eroho Yowarya.

118 Vano wa nyuwo olelo, nyuwo axinna a Ativentista a Seetimu tiya muhimnye wira nihiku na neethanu nenli ti Ekenyeryo ya Muluku, mukumihe Yoolempwa emosa wira mooniherye. Bibilia ohimnye wira Ekanyeryo ya Muluku ti Eroho Yowarya. Nwehe ela. "Yeeyo..." Nwehe eversiikulu 13 vano.

*...nuumala waamini, moottitthiwa ni e—ni Eroho yowarya yaalaiheriwe.*

119 Mwaakhunle aEfeso 4:30, kookupali wira ti yaawo. Noone sinto khennivaha 4:30, noone yaahikhale emosaru. aEfeso, ekapiitulu 4 eversiikulu 30. Ayo, ela eri va, 4:30.

*Nave muhiriipihe murima Eroho yowarya ya Muluku, yeeyo ethittiw'anyu ekanyeryo mpakha nihiku no woopoliwa.*

120 Mpakha liini? Mwaakhela-ru vekeekhai, vekeekhai Eroho Yowarya, eri wira Eyo ekhale mpakha liini? Mpakha muhakalaliho onoorwa, mpakha apiipi anyu ovira ephiro anyu, mpakha mukhulupale anyu woopwapwelani? Mpakha nihiku no woopoliwa wanyu! Aleluya!

121 Vammal'anyu okhwa, vammal'anyu ovira mukelaka Muttetth'ole, muneemel'anyu iwe n'ale onaaphent'anyu, nlelo muri oosarihiwa Eroho Yowarya. Yoolempwa! Munrowa okhala siiso mury'anyu vano, munkhalana paahi. . . muroorowa erutthu ekina. Muthaamale mampa paahi. Ela erimuuluvuala, khimwaawerya okhomakela-tho ithaapwa vapathoni, mattoro ahintta. Eyo ekeekhaii. Tivo nyuwo moohiya etthu iyo ya khalayi khuhiya yinttaka, khukela mwa ele esya. Eyo ekeekhaii? "Okhala wira emp'ela ya vathi va yakurumuwa vale, nookhalana ekina ennipelela."

122 Munnuupuwela nihiku nikina, wira naahoonu yeeyo? Okathi mwaana onuupey'awe mmirimani mwa maama, nto mitika iya sikhaani sinatannyeya n'utupha ni siiraka siiso. Masi naanaanoru maama amalaka-ru omukumihwa mwaana nto mwaana khurwa mulaponi, etthu yoopacerya, yookhala erutthu y'erooho wira yaakhele erutthu ile y'ephattu. Khino tothoro oninwaha e . . . [Munna Branham ommana ikuphi ni matat'awe—Mol.] ntoko *siiso*, wala etthu emosa wira amuttikinye, nto "waa, waa, waa." Nto naanaanoru onoorowa vatthirima v'ame awe, "um, um, um," ottikinyaka muru awe osulu ni vathi vatthirima va maama, wira mitika iye sa eleethi sikumihe eleethi.

123 Mwaanyompe, amalakaruru okumihiwa ni maama, owo onoovenya ni makuth'awe makhaani nuuvira minuutu vakhani. Exeeni onrow'awe wira? Onoorowa naanaanoru orukurerya, omuphiteerya maam'owo, khupacerya ottikinya muru awe mwaamukhaani osulu ni vathi siiso, n'uwurya eleethi awe. Aleluya! Ayo, mulopwana.

124 Okathi erutthu ila y'ephattu enimurweel'aya, yookhala erutthu y'erooho enlipilela yeeyo.

125 Nto okathi erutthu ila y'oyariwa-no emmorel'aya vathi, aleluya, yookhala emosa enlipilela iwe! Hiyo nnookhuma paahi mwa emosa nikelaka ekina, hiyo ninthaama nipuro nahu n'okhala. Ela enkhwa ehaana owara ehinkhwa, ela y'erooho; ela enintta owara ele ehinintta. Erutthu ila, ya mannyaari, yookhutupuwa, masi khenrowa orukunuwa mukhalelo aya nnakhala, kinihimya okathi eniphii'aya iwe, nlelo munrowa okhalana erooho yeeyo.

126 Mukihiye koovaheni etthu yaamukhaani eniiweya ntoko yootikiniha wa nyuwo, masi ti Bibilia, nuumala kinimoovahani emosa enrowa ohitikiniha wa nyuwo. Nwehe ela. Okathi Sawuli, mwe—mwene, mu—mulaleyi ule, muulupale a muromolelo iwe okathi ule, moosuwela, aarina muru ni makhata vasulu

v'ale othene, ni yaanoova, awo khayaasuwela hat'etthu ya Yoovikana soopattuxiwa. Davidi aahaana orwa khumukumiha mwaapwittipwitthi mwaano mwa kharamu, khumwiiva Koliyathi. Nkanweheni. Owo aahimurakamela saana Muluku, owo aahiphiyerya omunyokha mulaley'ula santu oophirikeya. Nto ohiya okhala ni yoowo, wira eeserye omukhaliherya, owo aaroomurukunuwela. Vakhala wira eyo kehiyo elatarato yoolikana, elatarato yoolikana. Aaroomuhiya!

<sup>127</sup> Akavi yaari muumu okathi waakhumaly'aka mukwaha woopacerya, khulaleya, "Davidi omwiivaka Koliyathi," okathi waakhumaly'aka? Anci-ene, akina, amosa-amosa w'ale atokweene. Kihanle okhuma-tho wa yeela. Munuupuwela, munnoona etthu yiiranekiye Ettiminku evinre? Enikela ehuhu ekina. Ekampaanya ya nenli ya Davidi, ehuhu ya nenli ya muteko awe. Eyo vekeekhai ekhweeli. Yoowo, nuumala aakhanle mwene a Isarayeli. Nwehe muteko vano onkela mweehuhuni yuulupale, ophiyeryaka okhala muulupale. Ti siiso iiraly'awe Davidi. Miyo kinniweha ela okathi waarw'awe, Davidi, oh, okathi Muluku aamwiirihaly'awe Davidi okhuma vale omwiiva kharamu, nwehe, ni khwiiva ekhaya, vano khumwiiva muFilisti. Vano, waahirwa okathi Muluku aaheny'awe erooho yootakhala mwa mmirav'ola. Ni ya . . . Ya xeeni? Wira amunyokheke Davidi. Nto kinnaamini . . .

<sup>128</sup> Vano, ifiita iya. Vano nwiriyane, axinna, nyuwo mufiitani mu, mwahiiraaneke ni miyo, mukilevelele. Moone, miyo kinnoophentani. Kinoorowa okumana ni nyuwo epante ekina khula enamuna, moone, 'okhala wira nyuwo mwaari mutthu a Muluku kinoorowa okumana ni nyuwo khula enamuna. Masi, kintthuna kihimye ela, va t'uri mwaha aya. Okhala wira Sawuli aahona wira Davidi aahikhalana etthu owo ahaarin'awe. Nto exeeni yaakhumelenle?

<sup>129</sup> Mwaamukhaani mmosa "ooxeerya," ookhurupuwa, Biblia ohimnye wira owo aari "ooxeerya." Owo khaari mwaana ooreera saana, "ooxeerya" owo aari mmiravo mmosa ookhurupuwa paahi. Vano owo khurowa iwe, nto Sawuli, vano, owo khuwara ikaruma sa Sawuli, ni kinnitthokelela wira nikula naaniphiya munawoni mw'awe. Nto owo khwira, "Mukirule etthu ila. Miyo—Miyo ko . . ." Khino owo anvahale ekharawu ya totori, Ph.D. wala L.L.D., wala etthu emosa, moosuwela. Moota owo iiraly'awe, "Nkinsuwela hat'etthu ya ithu iye, okhala wira nkinehererye. Mukihiye kikkhalane ela, okhala wira koosuwela eniiran'aka." Ayo, mulopwana. Owo aamukunxe pharancikula.

<sup>130</sup> Vano awo yaahimunanariha Davidi okhala wira aana axithiyana, ikereja, ikereja saamwiipa, "Sawuli, khino oowiiva ikonto sawe, masi Davidi oowiiva ikonto miloko sene."

<sup>131</sup> Vano owo khukhalana nrima, "Etthu yeele ele ya Nsina na Yesu, khamw'etthu Mme." Eyo ekeekhai. Vano exeeni

Muluku aamwiirihaly'awe? Muluku aaveleelin'he erooho yootakhala mwa yoowo, wira omunyakheke Davidi, vano owo aanimunyakha Davidi vahi nthowa.

<sup>132</sup> Davidi aamuwerya ophunyaka mmilo awe imaara kamosa-kamosa. Owo aamuwerya, masi aaroomuhiya paahi. Owo khaatonko ohimya hat'etthu. Owo aaniwerya wira. Owo aaroorowa khuthikila mwiila w'ekhasako awe, ohiyu umosa, khutthika, khwira, "Nkawehani va, moone!" Ayo, mulopwana, owo aamuwerya wira, masi aaroomuhiya paahi. Owo aamuwerya okurumula muthukumano awe ni waamwarya, n'upacerya mutthenkeso wawawe aatthunne-ru wira. Masi uwo khiirale, owo aaroomuhiya Sawuli okelela ohoolo. Mmuhiye Muluku awane ekhotto ene. Ayo, mulopwana.

<sup>133</sup> Tivo okathi waakelel'awe ohoolo ni ekampaanya khumala, khukelela ohoolo, erooho ele yootakhala khuphiyererya Sawuli vahaawery'awe waakhela yoowaakhula ekhumaka wa Muluku. Nuuvira okathi vakhani owo. . . Eroho y'Apwiya yaahimuhiya. Nto Samuweli, yoole awo yaamukhoottaly'aya, yoole vekeekhai aari Nsu na Muluku wa yaawo, yoole aahimenrye awo ehinatthi wiiseettiha ntoko atthu a molumwenkuni.

<sup>134</sup> Sayi ekereja otthunaka okhalana meettelo ntoko atthu a molumwenkuni? Xeeni aPentekosite, oopatisiwa, aMetotista ookhalana musuwelelo wa Eroho Yowarya, ni aPatista, ni maPrespiteriyaano otthuna meettelo ntoko atthu a molumwenkuni? Awo aniirela exeeni? Miyo nkisuwenle. Miyo—miyo nkinwerya osuwela saana. Nyuwo muniira, "Ahe, ti yooreera saana omuttikha pookeri, othweela vakhani paahi, ohela woopacerya wa esentavo emosa paahi," khula enamuna eniihan'anyu. Eyo etampii. Khivaatthuneya okhalana itthu sene iyo mpaani mwanyu. "Vano, khiva mulattu owurya, ekoopho yaamukhaani ya saravexa. Hiyo ninwurya vakhani paahi. Miyo n'amwaar'aka ninwurya vakhani oxekuwa." Nto naanaanoru, an'inyu anniwurya vakhani. Vekeekhai ti siiso.

<sup>135</sup> Nto nyuwo axithiyana, hum, xetwani oopaka paahi. . . Ti yeeyo owo iiraly'awe wopaceryani, ni owo oopaka exeko wa nyuwo axinna athiyana. Owo oniira eyo paahi wira. . . 'okhala wira owo onnisuwela etthu okhanly'awe wira. Owo onniwerya omoototha muthiyana voowaakuvaxa imaara ekonto onvikana mulopwana. Koosuwela wira eyo ennoosikulihani, masi eyo Ekeekhaii. Eyo ekeekhaii. Ti yeeyo owo iiraly'awe omatta w'Edeni. Owo onniwerya opaka. . . Vano, muthiyana aari a nneema, aari naxariya, masi aahootothiwa. "Atamu khootothiwe," Bibilia oohimya. Owo khootothiwe, masi muthiyana aahootothiwa. Tivo owo onniwerya omoototha muthiyana. Nave nlelo mapastore anoorowa ni waakhaliha athiyana alaleyi, waahela vasulu va mithukumano siisaale, ni Bibilia ola onnipwapwela okhuma Maphattuwelo mpakha Wiisuupulula. Nyuwo muniira, "Ahe, ti vooreera. Ti vooreera.

Awo aakhalana . . . Awo anniwerya olaleya ntoko siiso.” Miyo koosuwela wira ekeekhahi.

136 Ntoko mutthu aapacenrye olavula ilavulelo emaara emosa, miyo khutthikela kilaleyaka. Nto vakhumenly’aka vate, muthiyana mmosa khumwiirela mwan’aka, khwira, “Kookhalana mutthaka wira kihimye meelo ohiyu,” khwira, “Atith’inyu yawela-ru vaplataforma.”

Khwira, “Ahe, Muhano, munihimya exeenii?”

137 Nto ohiy’ule valikanne aya, okathi kaatthun’aka wiihana waltaari, owo khureerihai maihi awe othene khookola imeeya sawe n’itthu sothene, khulikana, khutupha eriyari ya vathi khupacerya otupha osulu ni vathi, khulavula ilavulelo khulaleerya. Miyo khutthikela kilaleyaka paahi, wiihana waltaari. Okathi miyo ohinattittimih’aka hata vakhani, khiyaari yoolikana. Tivo nto, ahe, Bibilia ohimmye wira nnari, ohimmye wira, “E—Eroho ya maprofeta enimwiiwelela profeta yoowo.” Muluku ori va . . . Muluku onoolavula vaplataforma, Owo alavule. Paulo ohimmye wira, “Yakhala etthu onuupululeliwa mmosa, owo amaale mpakha mmosa amalihe.” Ti yeeyo.

138 Vano, nto okathi okhumenly’aka vate, atthu ala khwira, nikhuru nuulupale n’atthu, khwira, “Nyuwo mwaahiripihai murima Eroho Yowarya ohiy’ula.”

Miyo khwira, “Kiiraka exeeni? Kiirale exeeni?”

139 Khwiriwa, “Ahe, okathi munn’ole mthiyana ohimaly’awe mutthak’ole, aleluya, ohimaly’awe yoowo.”

“Vano,” miyo khwira, “Miyo kaamulaleya. Owo aahikhuma mwa sooruma.”

140 “Oh,” khwira, “owo waari musya waakhuma Veehiceni. Owo t’okhanle musya saana ovikana ele mwaalaley’anyu.” Uh!

141 Vano, eyo enooniherya paahi e . . . eyo enooniherya ela, ni kinihimya ni nttittimiho, wala ovahuwa, wala ohittittimiha, wala wiixutthihiwa woonyala ohinsuwela-tho sa Muluku onvikana namarokolo onsuwela sa ixapatho sa munakhutuni. Vano, eyo, nkinihimya eyo wira ekhale e—nweheryo wootheihai, okhala wira nla khanihiyo nipuro no woopa-vo iperwa. Masi eyo—eyo ekeekhahi voolikana. Mutthu aarowa osuwela wira Muluku kahiyo mwaneene manyakunyaku. Owo ta murettele. Bibilia awo khammusuwela. Yothene yaasuwel’aya wira otupha osulu ni vathi, olavula ilavulelo, wira, “Kihaana Eroho Yowarya. Aleluya!”

142 Miyo kinneemelaka ni owoona, wAfrica, akhwiri n’itthu olavulasa, ntoko ikonto thanu a yaawo emaara emosa; etuphaka osulu ni vathi, ephome wiitho waya wothene, elavulaka ilavulelo, n’uwurya ephome munikarakasani na muru wa mutthu; omwiihana xetwani, n’ulavula ilavulelo.

143 Nave onamwi olavula ilavulelo ekhanle-ene yoovaha ya Muluku, masi kahi ethoonyeryo yoohivonyeya ya Eroho Yowarya. Mukihiye kooleleni yeeyo vano. Kinnaamini wira atthu othene oowarya oowuupuxeriwa annilavula ilavulelo. Kinnaamini wira mutthu imaara sikina onikhala owaakhelaxa muupuxeryo ni Muluku mpakha vanrow'anyu olavula ilavulelo. Kinnaamini yeeyo. Masi nkinaamini wira eyo t'ithoonyeryo wira mookhalana Eroho Yowarya. Ayo, mulopwana. Kinnaamini wira wookhala okathi onikhalan'anyu waamini, mutthu, mwaamukhuma mwamwiixaatherye matata mwanamwane orina kankuru, alaleyi miloko mithanu envekelenle-ene, vano aamuvona okhala wira mai ule aahikhalana waamini mwaha wa mwaan'owo. Muluku oomuvaha, owo mutthu a Erutthu ya Kristu. Ayo, mulopwana. Miyo kinnaamini iyo. Miyo kihoona eyo wiiriwa ni koosuwela wira ekeekhaii. Masi ele ekhanle, ti ekereja eri oratteene, yookhalahiwa oratteene wira niweryeke ovara muteko.

144 Vano nrowe nimalihe ele ehanle ya eversiikulu ila nihinatthi orowa.

*. . . nuumala waakhela, mootthittiwa ni Eroho yowarya yaalaiheriwe.*

145 “Ekanyeryo!” Exeeni Ekanyeryo? Exeeni Ekanyeryo? Ekanyeryo ti, etthu yoopacerya enooniherya muteko omalihiwe, muteko omalenle. Etthu enttharelana enoonihery'aya ekhalanelo. Ni etthu enttharelana enoonihery'aya elipelo, osuka yeeyo.

146 Niire, ntoko nlikanyiho, miyo kaanivaraka muteko Muxipooroni w'oPennsylvania, kaanivaraka muteko n'atithi aka muxipooroni. Hiyo naapakhirelaka ikaaro. Nto naanihela mu ekupaniya ela yoopakhirela, naanihela-mo ilaatha, nto naahelaka makina osulu *nno* ni makina vathi *va*, ni makina *so*. Masi ekaaro ele ehinatthi otthukiwa, mulipa-oowehaweha aamuviravira vale, nto owo aamuvura, aamuvura vasulu va *ela*, ottikinya *ele*. “Ah! Opwapwela! Awo anookhala kapatti-kapatti ehinatthi ophiya iwe. Opwapwela! Ekumihiwe. Mpake vasya.” Mulipa-oowehaweha aanipwapwela ekaaro.

147 Eroho Yowarya ti Mulipa-oowehaweha. Eyo enimoottikinyani vakhani, vano nyuwo munoottikinyeya. Munnaamini Masu othene a Muluku? “Nkinaamini etthu iyo ya Nsina na Yesu.” Opwapwela. Nyuwo munoottikinyeya, moone. “Miyo nkinaamini ovoniha wa Muluku wala etthu ntoko ele.” Nlelo moottikinyeya. Mwaakumihe. Munaamini wira Yesu Kristu mmosaru nsana . . . “Ahe, mwa enamuna emosa.” Munoottikinyeya. Mukumiherye ota, moone, khenalikane nlelo. Ayo, mulopwana.

148 Munna, eyo yalikana-ru wira yiire, “Amen!” Muhaakhela Eroho Yowarya? “Amen!” Sothene soomalihiwa? “Amen.” Vano



Mulipa-oowehaweha oniira exeenii? Sothene ti soopakhireliwa vooreera ni soovureya, soosareya Ehapari vooreera. Oh, Masu a Muluku othene t'oreera. Sothene ti sooreera voomalela. "Miyokinnaamini Masu othene. Amen! Amen! Amen!" Munnaamini wira Muluku nlelo onnivoniha? "Amen." Munnaamini wira Yesu mmosaru nsana ni mahiku othene? "Amen." Munnaamini wira Eroho Yowarya ti yeekeekhai ntoko saatonko aya okhala? "Amen." Munnaamini wira Eroho emosaru yaamukhuruwenle Paulo enninikhuruwela hiyo? "Amen." Munnaamini wira Eyo enniira itthu imosaru mwa hiyo siiraly'aya mw'ale? "Amen." Oh, oh, eyo enoovureya vano. Moone, enoovureya vano, noolikana wira niwale mukhora. Vaareera.

149 Vano mulipa-oowehaweha onoowala mukhora. Owo oniira exeenii? Owo onihela ekanyeryo mwa yeeyo. Vano onoorwa nno khukuxa ipano iya saamukhaani s'etthu, khookolela ntata vale etthu ila yaamukhaani khutthuka yeeyo. Vanreerela muhitaphule. Vakhala wira iye, ekaarole, ekiseryo aya oBoston, ehikhaleke yoothaala. Waamukhala mulattu w'ehukhumu otaphula ekanyeryo ele mpakha ephiye oBoston. Nto mutthu orina okhulupale onoowerya otaphula ekanyeryo ele, nave yoowo paahi. Eyo ekeekhaii. Eyo ti ya ekupaniya ya xipooro *khata-khata*. Eyo ekanyeryo aya. Eyo elipelo aya wira ekaarole ya yoopakhireliwa, ekaarole ya yoolikana. Eyo ti yawaya yaawo. Khivaakhanle ooheliwaka "B&O" va "Pennsylvania." Muhaana otthittiwa ekanyeryo, ni yaatthittiwaka.

150 Nto okathi muKristu onipakhireliw'awe ni Ehapari vooreera, oosareya oreera murima wa Muluku, itthu sothene sooreera sa Muluku siry'ene mwa yoowo, ni murima wootthukuwa, oolikana wira ovare muteko, otthunaka okhalihiwa voopuroni, ovara khula etthu Eroho Yowarya enimuhimery'aya wira ovare, oovira mookhwani khuphwanya Ekumi, ooreerihiwa wa itthu sothene sa molumwenkuni, eettaka moWaaryani okathi Waarya onorw'aya wa yoowo, okelelaka ohoolo, owo t'olikana. Vano Muluku onoowala mukhora wa olumwenku ottuli wawe, ni onookakha siisaale, khumutthitta ni Eroho Yowarya elaiheriwe. Aleluya! Mpakha liini? Mpakha omakiseryoni. Muhimukumihe nno muxipooroni khutaphula woottho sinto itthu sothene siri oratteene. Sothene siri saana, muhiye paahi. Mulipa-oowehaweha oomala oowehaweha. Mutthittiwe mpakha liini? Mpakha nihiku no woopoliwa wanyu. Eyo ti elekelelo otthittiw'anyu.

151 "Ahe, okathi onkhw'anyu, nto, Munna Branham, ankhimwakhwa vale, muhimmye wira nlelo mookhalana Yeeyo?" Mookhalana mahiku othene. Ekumi enipacerya vayi? Waltaari. Weiwe wene munoon'anyu eruku vakhani. Eyo erukuu, Ekanyeryo ya Eroho Yowarya. Vano nto eruku ya iruku ya iruku, ntoko saahimaly'aka nihiku nikina. Masi okathi onkhw'anyu, munootthikela nviraka muhina wa iruku iyo mpakha enaanelo,

okhuma enaanelo mpakha ephattuvelo yaamukhaani, okhuma vephattuveloni mpakha muratthi, okhuma muratthi mpakha muro, okhuma muro mpakha ephareya yuulupale, moone, ophenta wa Muluku. Nyuwo mwa mutthu mmosaru yoole.

<sup>152</sup> Nkawehani va. Sawuli, namuhiya waamini, owo khaawerya omwaattama Muluku, nave khaapweteiye. Vekeekhai owo khaapweteiye. Owo aari profeta, masi aarookhuma wa Muluku paahi. Mwaha wa yeeyo, munna, miyo kiiraly'aka, "Khaapweteiye." Vano nto muupuwele, owo aarookhuma mwa othuna wa Muluku paahi, vano nto naanaanoru, owo—owo khiiraana. Vano, khino nkaakhanle oohimyaka yeeyo. Vaareera, kintthuna muthukumano wootteeliwa murima ohiy'ula. Tivo nto, moosuwela, nto naanaanoru, oh, wulu, nto e...Owo khurowa wa u—Urimi Tumimi.

<sup>153</sup> Nyuwo munnisuwela ole aari Urimi Tumimi, yaari ekuwo ya vatthirima, eefoti a—Arooni aawar'awe. Ni eyo okathi wothene yaari, Muluku okathi wothene onikhalaka Muluku muulupale onaakhula mwa inamuna suulupale. Nto okathi profeta aalaleery'awe, vano mithuko iye sootikiniha khuhaarya va Urimi Tumimi vale, owo aahivonya. Namaloha athariharu yooloha khuhaarya va Urimi Tumimi vale, nkincala oreera xeeni yiiwey'aya, yaahivonyeya. Eyo ekeekhaii.

<sup>154</sup> Ni nkincala vekeekhai ikharawu kavi s'etotori murin'anyu ni munnuwelo xeeni mutthenkeso anyu ory'aya, ohimya wanyu w'eprofeta wala olaleya wanyu, waahikhale ntoko Masu ala, moovonya, munna. Nyuwo mwa...Ala ti Urimi Tumimi a Muluku. Mwaahimya wira khamutthommwe ohinatthi opattuxiwa olumwenku, owo khonrowa waarya, okhala wira Bibilia ohimye wira mootthoomwa. Mwaahimya wira mwaahaana opatisiwa ni nsina "n'Atithi, Mwaana, Eroho Yowarya," owo khonaarya, okhala wira khaavo mBibiliani otonko opatisiwa siiso. Ni Nsina na Pwiya Yesu paahi. Khonrowa waarya, tivo yookhala evonyeie nipuro nlo.

<sup>155</sup> Tivo Urimi Tumimi khaamwaakhula Sawuli, ni khaawerya okhalana hata yooloha. Owo aahisusa saana mpakha vahawery'awe hata okhalana yooloha. Vano moosuwela etthu yiiraly'awe? Owo aaronwe wa mukhwiri, nto mukhwiri ula, mukulukhana a xetwani mutokweene iwe, mukulukhana mukhwiri. Nto owo khwira, "Munniwerya waaxerya ehako?"

<sup>156</sup> Owo khwira, "Ayo, masi Sawuli iirale aamuwiiva othene ale yaaxerya ehako."

<sup>157</sup> Owo khwira, "Miyo kinimookhapelelani," khwiiwariha ntoko karumeya. Owo khwira, "Mukaaxererye ehako mukiruuhele okhuma w'alipa-ookhwa avinre avikanne nno." Vano nwiriyane ela. "Mukiruuhele erooho ya Samuweli profeta."

<sup>158</sup> Nto owo khukela wa—waaxerya ehako. Vano, waaxeraly'awe, khuurama aipopheyaka, owo khwira,

“Kinniwoona amuluku ewelaka.” Moone, owo aari pakawu, “amuluku,” anli wala araru a yaawo, ntoko Tithi, Mwaana, Eroho Yowarya, wala etthu ntoko yeeyo, moosuwela. Owo khwira, owo khwira, “Kinniwoona amuluku ewelaka.”

159 Khwira, “Mmuhimye. Onlattana sayi? Owo onlikana n’ixeeni?”

160 Khwira, “T’ohivaala ni ookhalana mukhumi mmakhatani.” Owo khaavirikanne, hata vakhani.

161 Owo khwira, “Ti Samuweli. Mmuruuhe mpaani mu, mukiruuhele va ohoolo waka.”

162 Ni nwehe okathi Samuweli oruuly’awe ohoolo wa Sawuli, owo iirale, “Mukiihanenleni, woonaka wira nyuwo mwa nwanani a Muluku?” Ni nwehe. Kahi wira aari Samuweli paahi, owo nlelo aahikhalana erooho y’eprofeta. Muhimye wira ti yoovonyeya, mutthu ahimye wira ti yoovonyeya. Eyo Ekeekhaii! Owo nlelo aari profetaa. Maana owo iirale, owo aahilopola khwira, “Ekhotto enoorweelani nyuwo meelo, vano nyuwo ni an’inyu munoomora okhottoni meelo, nto okathi yoola meelo ohiyu munookhala ni miyo.” Eyo ekeekhaii? Owo nlelo aari profetaa!

Vano nyuwo muniira, “Oh, masi ole aari mukhwiri iirale yeeyo.”

163 Vaareera, kinimooleelani Mmosa ahaari mukhwiri. Yesu aahimukuxa Petru, Yakopo, ni Yohani, khurowa Vamwaako va Orukunuwa emaara emosa, nto yeemelanse vasulu vamwaako. Nto, Yesu, Muluku aamukhaliha Mwan’Awe voopuroni; ntoko kinnesery’aka yeela...naahoono ohiyu mukina, omukhaliha mwaana voopuroni. Nto vairans’aya siiso, awo yaahiweweha khuphwanya wira vale aari Moise ni Eliya. Awo yaamulavulasa, epatthanaka. Kahi ipantera sikhaani soottelea siveveleyaka, wala meeku oottelea, kiireke, yaaveveleya vale. Masi awo yaari atthu, elavulaka. Moise iira ovithiwe-ene vamaahiye voochikwerethiwa mwa iyaakha imiya thanu na tthaaru. Nto Eliya aaronwe Owaani mukaaroni, iyaakha imiya thanu. Nto va awo yaarisa va oowanli aya, nlelo akumi ntoko saatonko aya okhala akumi, yeemenle-ene vale elavulaka ni Yoowo ohinatthi orowa oKalvario. Aleluya! “Ootthittiwa ekanyeryo mpakha nihiku no woopoliwa wanyu!”

164 Kinimwaakuva, vano nto ninoomaliha ’okhala wira vahiila, ni nimwaavekelela aretta, ntoko minuutu mithanu sikina. Eversiiikulu 14, osoma, mukihye kisome 13, ohela, mulipiheryo.

*Mwa yoowo nyuwo...omuroromenly’anyu, nuumala wiiwa masu a ekeekhai, ehapari yooreera yo woopoliwa wanyu... .*

165 Vano muupuwele, woopoliwa xeeni awo arin’aya? Ala yaari—ala yaari aKristu aEfeso. Awo, vano nkawehani, muhaaweha

aKorinto? Owo okathi wothene aahaana waahimeerya, “Kaarwaaka eriyari anyu, mmosa orina elavulelo, mmosa orina elavulelo, mmosa orina esipo, mmosa orina olaleya, mmosa orina . . .” Moone, owo khaawerya owiixuttiha etthu, ’okhala wira awo okathi wothene yaatthuna *ela, ele wala ekina*. Atthu ala yaahikhalana etthu emosaru, masi awo yaarina oratteene. Owo khonaaxuttiheke aKorinto hat’etthu ntoko yeela, owo khaawerya, ekereja khayaari oratteene wira yiixuttihiwe eyo. Vano, owo aawerya waaxuttiha atthu ala etthu yekeekhai.

*. . . yeeyo, woopoliwa wanyu: mwa yoowo nave-tho nuumala . . . waamini, mootthittiwa ni Eroho yowarya yaalaihiriwe,*

*Yoowo okhanle neemexeryo . . . (oh, mukihye kihihye yeeyo) . . . neemexeryo na soohiyeriwa sahu mpakha . . . woopoliwa wa muxovo woothumiwa, wira nivuwihwe nttittimiho nawe.*

Wau!

<sup>166</sup> Exeeni Eroho Yowarya? Vano, nto kinoosoma ele ehanle ya yeeyo vowaakuvexa mwavilelaru ni miyo mpakha va. Naari vayi hiyo ohiyu mukina, Munna Mike? Weiwo awo othene yaary’aya ootthapa, oh, sothene waari murettele, owo waari ophenta woomalela. Vano, khula okathi nyuwo munrwaanyu epantte *ela* nno munookhuruwa vakhani, okhuruwa. Khula okathi mumpak’anyu nivalo, munimwaattamela isentimeeturu kamosa-kamosa. Vamphiy’aya vathi elapo ya vathi, munkhalana eruku ya eruku ya eruku ya iruku. Vano, ti eyaattelo ya Eroho Yowarya murin’anyu mwa nyuwo. Iwo ophentaa. Masi, oh, munivoliwa ntthona na etthu.

<sup>167</sup> Oh, atthu ntoko atokweene khayaatthuna, atthu atokweene . . . Moota kaatthun’aka otthikela otthuli khukhalana-tho iyaakha muloko ni thanu, miloko miili! Oh, kaamuvaha etthu p’itthu. Oreera xeeni waarow’aya okiiriha? Pooti okhalana muloko ni thanu khukhwa ohiy’ula. Ti yoohisuweleya. Ankhi nyuwo mwaarina muloko ni thanu ohiy’ula, munsuwela sayi sinto amaama yaamukhala akumi, okathi oniphiy’anyu owaani, wala nnari? Munsuwela sayi wira munoophiya owaani? Munsuwela sayi wira munookhala mukumi meelo mwaarin’ene iyaakha muloko ni piili, ekumi yooloka? Pooti wiiviwaka muhasarani, khumora ookhweene, etthu p’itthu pooti owiirani. Yoohisuweleya, moone. Khiivo hat’etthu nno yoosuweleya. Masi nyuwo munnitthuna yeeyo. Exeeni iyo? T’ile osulu Iwe enookhalihani ootthuna yeeyo.

<sup>168</sup> Vano, nyuwo munkela mwa Yeela, nto munookhalana Ekumi Ehinimala. Vano exeeni eniiraneya? Nlo ti “neemexeryo.”

<sup>169</sup> Exeeni oliva woopacerya wa etthu? Karwa wa nyuwo othuma ekaaro, kiniira, “Ekaaro ele enkhala kavi?”

170 Nyuwo muniira, “Ekaaro ela, Munna Branham, enookhwa itoolare ikonto tthaaru.”

“Oliva woopacerya kavi?”

“Ahe, kinimoonnyani ni itoolare imiya thanu.”

171 “Vaareera, itoolare imiya thanu iya. Kino—kinooruuha ole onihala okathi aya, kimalaka-ru ophwanya. Nyuwo musuke ekaaro eyo.” Miyo kiniwunnyani itoolare imiya thanu, nlo ti neemexeryo. Ti yeeyo?

172 Vano, musuke eyo, nlo “neemexeryo,” iwo ti “oliva woopacerya.”

. . . nuumala *moothhitiwa* ni e . . . *Eroho yaalaiheriwe,*  
e . . . *Eroho yaalaiheriwe,* . . . nuumala *moothhitiwa* . . .

*Yoowo okhanle* . . .

Exeeni, exeeni ekhanle Ekanyeryo yaalaiheriwe, Eroho Yowarya yaalaiheriwe?

*Yoowo okhanle neemexeryo wa soohiyeriwa sahu*  
*mpakha . . . woopoliwa wa muxovo othumiwe, . . .*

173 Exeeni iyo? Iwo oliva woopacerya. Nto, munna, oh, oh, oh, oh, oh, alaleyi! Iwo wakhala p’uliva woopacerya, enrowa okhala exeeni okathi hiyo othene onrow’ahu ophiya iwe! Enrowa okhala exeeni? Ola wakhala . . . Vakhala wira ela empuh’ahu vano, n’utteeliwa murima saana mpakha . . . Kinniwoonaka atthu a iyaakha miloko mithanu na mixexe owela paahi . . .

174 Kaahimoonna mulaleyi mmosa mutokweene aavennyee ohiyu umosa. Owo aarookhuma, khwira . . . Ntoko *sa*, akhumaka vaplataforma. Nto miyo khwira, “Mulopwan’ole mutokweene onrowa olaleya?”

175 Owo khwira, “Ahe, attottopeliwe Apwiya.” Mulopwana mmosa mutokweene ooriipa, owanreene ekhasako yoorakama ya khalayi ya mulaleyi.

176 Miyo khwira, “Ankhi ohihiiwaka amosa-amosa w’amiravo ale olaleya? Mulopwan’ole mutokweene, onwerya sayi okhalakhala alaleyaka?”

177 Owo khwira, “Ahe,” owo khwira, “axinna,” owo khwira, “olelo kinniwiiwa axinna elaleyaka nihiku nothene,” owo khwira “sa itthu Yesu iiraly’awe elapo ya vathi. Kinrowa ohimya itthu Owo iiraly’awe Wirimu.” Owo khwira, “Kinrowa okuxa yoosom’aka ohiy’ula mwa Yobi 7:27,” khwira, “okathi waary’aya khalayi ottuli wu ohinatthi opatuxiwa olumwenku,” khwira, “okathi Owo ohimaly’awe wira ittheneeri s’oxaka saaniipa vamosa n’ana a Muluku yaanikhuwela mwaha w’otteeliwa murima.” Aapacenrye siiso. Khwira, “Moosuwela ela, wu yaahikhumelela etthu ottuli wu.” Owo khwira, “Moosuwela . . .” Nto owo khupacerya ohimya itthu saakhumelenle Wirimu. Owo khuruuha ekhweyi yoowaataleleya mwa Orwa wa nenli. Okathi

ene yoowo, Eroho Yowarya khummana. Vano, awo yaahaana omweettiherya mutokweene ole, owo aari eriyari ya iyaakha miloko mithanu na mixexe ni thanu. Owo aari so, oowuurama othene, ni nikopwe naamukhaani na maihi, moosuwela, so. Khukhuma vale khupacerya olaleya, khwira, “Wuu! Aleluya! Ovuwa!” Khupacerya otupha osulu ni vathi siisaale. Khwira, “Oh, khamurina opuro oniphiyerya va wira kilaleye.” Nto khurowa, vathi saale, voowaakuva ntoko saawery’awe. Nto nlo neemexeryo paahi. Oh!

178 Eroho Yowarya eniira exeeni? Oh, va nookhala nipuro nooreera, mukihye kisome eversiikulu 1 y’ekapiitulu enttharelana. Kisomeke? Ti voolikana? Mwiire, “Amen.” [Muthukumano oniira, “Amen!”—Mol.] Vaareera, eversiikulu 1 ya ekapiitulu 2, voowaakuva. Nwiriyaane. “Nyuwo mwaari . . . nyuwo . . .”

*Nave ohookhalihani akumi, nyuwo mwaari ole . . .  
mwaahikhwa mwaha wa s’ottheka sanyu ni wa itampi:*

179 “Owo ohookhalihani akumi.” Exeeni enihimya ohookhalihani akumi? “Ohoovahani ekumi.” Oohalela okhwa, masi Owo khookhalihani akumi ni musurukhu yoowo wa neemexeryo. Enrowa okhala exeeni okathi nyuwo—okathi vekekhai onrow’anyu okhalana ikawanelo sothene sooliviwa? Oh! Khivanxankiha Paulo, aakuxiw’awe mpakha erimu ya neeraru, khwira, “Niitho sihoonaly’aya; niyaru sihiiwaly’aya; nnakhala sihiphiyale, sihiphiyale vamurimani va mutthu, seiyo Muluku orin’awe w’ale (aasukenly’awe) ale animphenta.” Enrowa okhala exeeni iyo! Nyuwo munihimya ophenta ohinlavuleya ni woosareya ovuwa! Whish! Hmm! Nyuwo mwaahikhwa mwaha wa itampi ni s’ottheka sanyu Owo ohookhalihani akumi vamosa ni eruku ya eruku ya iruku. Enrowa okhala exeeni okathi onrow’anyu ophierya eruku ya iruku mpakha mw’erukuni, eruku vano nuumala mpakha muratthi, muratthi mpakha muro, muro mpakha ephareya yuulupale?

180 Ni exeeni iyo okathi ory’anyu iwe moowoopoliwani, ni erutthu emosa esya, mutthikenleene-tho okhala mmiravo voomalela, wala mwali, muhirowaka-tho okhwa? Nto munaweha vathi, ni wuupuwela, “Kaamuwerya opuha iwuuva kamosa-kamosa ni maasi ooreera oriirya, masi, moosuwela, miyo nkimphavela iyo nno. Masi nihiku nimoso Yesu onimoorwa, nto erutthu ila ya nlaikha, eteyofaniiya ela onikhal’akamo . . .” Khenrowa-tho orwa ekhumaka mmirimani mwa muthiyana, khenrowa orwa mwaha w’otthuna w’ekhapa; masi okhala wira Owo oyariwe vahikhanle otthuna w’ekhapa, miyo kinoohihimuxiwa vahikhanle yeeyo, ni Owo onoolavula nihiku nlo nto ale akhwiye mwa Kristu anoohihimuwa, nto erutthu ile kaatonko aka okhala-mo enoohihimuwa mwa erutthu yoovuwihwiwa, nto kinoorowa weetta n’ulavula, ni kinoorowa

okhala mukumi ni opuha (aleluya), kinoorowa okhala mwa okathi Ohinimala onrowa orwa, mwa Yesu Kristu Pwiy'ahu. Whish! Eyo vo, munna, eyo ti Ehapari yooreera!

<sup>181</sup> “Tivo miyo-tho,” Paulo onaahimeerya paahi ele ekhanly'awe. Kinosoma ele ehanle ya yeela nuumala nto naavekelele aretta. “Mpakha okhalana, nla ti neemexeryo mpakha okhalana, nikhale oovuwaha nttittimiho Nawe.”

*Tivo miyo-tho, vaiwaly'aka waamini wanyu* (Kihiiwa wira nyuwo munnaamini ithu iya, kihiiwa wira vekeekhai muhaamini otthommwa, Ekumi Ehinimala, ni woopoliwa, ni sikina) *mwa Pwiya Yesu, ni waaphenta wanyu othene. . . oreera murima,*

*Nkinihiyererya oxukhuru mwaha wa nyuwo, kiwuupuwelakani mmavekeloni mwaka;*

*Wira Muluku a Pwiya'ahu Yesu Kristu, Tithi a ovuwa, oovaheni erooho y'ankhili ni wooniherya. . . osuwela wawe:* Atthikele paahi iisuupululaka Mmansawe wa nyuwo okathi wothene, munnuwaka ni mahala mpakha mahala, mwa owerya n'uwerya, ovuwa n'uvuwa. Kahi otthikela ottuli; ni, ovuwa n'uvuwa, mutthikele mukelelaka ohoolo. Miyo kinookhala koovekelelalani.

*Niitho—maitho a maiwelo anyu. . .*

<sup>182</sup> Hum! Moosuwela, mBibiliani ohimmwe wira mwaari oohoono ni khamwaasuwela. Masi va Paulo ohimmwe wira, “Kinrowa ovekela wira maitho a maiwelo anyu. . .” Nyuwo muniwa saana ni murim'anyu. Ti yeeyo owo onihim'y'awe. Nyuwo munweha ni niitho nanyu, masi munoono ni murim'anyu. Nyuwo munnisuwela eyo. Vaareera. “Wira Muluku a Ovuwa. . .” Nrowe noone, e—eversiiikulu 18.

*Maitho a maiwelo anyu emwaleeliwe; wira musuwele nrromelo na wiihaniwa, ni muhakhu wa. . . ovuwa waahiyenry'awe atthu ooreera murima,*

*Nave munnuwelo xeeni orin'awe ikuru soowerya wa hiyo. . .* (whish! Awo aniira wira owerya woomala? Owerya hata khunatthi orwa). . . *hiyo nnimwaamini, ntoko soowiira sinikumihery'awe n'ikuru sawe s'owerya wawe,*

Nyuwo mwaaminni soowiira Sawe sa ikuru s'owerya Wawe, Miyo kinvekela paahi wira Muluku omwaraxele owerya Wawe mwa nyuwo. Munnona?

*Soonihenry'awe mwa Kristu, okathi omuhihimuxaly'awe yoowo—yoowo mookhwaani, khumukhalaha moonoo awe woolopwana ma. . . mapuro a wirimu,*

*Vasulu va. . . omwene, . . . owerya, . . . ikuru, . . . olamulela, ni masina othene anromoliwa, . . .*

183 Oh, oh, oh! Maana- . . . Nnari, vanreerela nnari. Vekeekhai naamuwerya okuxa ohiyu wothene ohanle nilavulaka yeeyo.

. . . *masina othene anromoliwa, vooikhla olumwenku ula paahi, nave ni molumwenkuni w'ohoolo:*

184 Exeeni ekhanle othene—exeeni ekhanle masina othene? Masina othene na khula mutthu ninrowa wiihaniwa Nsina na xeeni? [Muthukumano oniira, “Yesu.”—Mol.] Erimu yothene eniihaniwa Yesu. Ekereja yothene eniihaniwa Yesu. Itthu sothene siniihaniwa Yesu, maana Nlo ti Nsina nimoso paahi Muluku otonko awe okhalana. Owo oniihaniwa Yehova; Yehova jire, Apwiya aavaherya Mukuttho; Yehova raafa, Apwiya anoovonihani; Yehova, epantera y’Apwiya, Manase; ni Yehova, aYehova oovirikana. Owo oniihaniwa Ettheneeri y’Oxaka. Owo oniihaniwa Tithi, Owo oniihaniwa Mwaana, Owo oniihanihwa Eroho Yowarya. Owo oniihaniwa Alfa, Owo oniihaniwa Omeka. Owo oniihaniwa Ephattu, Owo oniihaniwa Emalelo. Owo oniihaniwa Yoophuwa. Oh, Owo oniihaniwa . . . Owo oniihaniwa inamuna sothene sa itititulu, masi Owo aahikhalana Nsina.

185 Ti yeeyo Matewu aahimy’awe, okathi Owo ohimaly’awe wira, “Murowe mwawiixuttihe atthu a maloko othene, mwaapatisaka ni Nsina,” kahi ni masina, “ni Nsina n’Atithi, Mwaana, ni Eroho Yowarya.” Tithi khanihiyo nsina, Mwaana khanihiyo nsina, Eroho Yowarya khanihiyo nsina. Eyo etititulu ya Nsina. Nlo Nsina na mikhalelo miraru siri sa Muluku mmosa. Nsina Nawe naari nvi? Nlaikha niirale, “Munrowa omwiihana Nsina Nawe. . .” [Muthukumano oniira, “Yesu.”—Mol.] “okhala wira Owo onoowoopola atthu Awe mwa itampi saya.” Mwaha wa yeeyo awo yaapatis’aya siiso mBibiliiani. Ti siiso Agostinho Oowaarya aamupatisaly’awe Mwene a Inglateera, mwa—mwa iyaakha soophiyaka emiya ni miloko mithanu, iyaakha imiya piili vakhwiw’awe Kristu, ni Nsina na Yesu Kristu. Vaareera.

*Vasulu va . . . omwene, . . . owerya, . . . ikuru, . . . olamulela, wira—wira masina othene anromoliwa, vooikhala olumwenku ula paahi, nave molumwenkuni w'ohoolo:*

*Ni ookhalaha itthu sothene vathi va inawu sawe, ni oomuvaha yoowo okhala mukhulupale a itthu sothene sa ekereja,*

*Yeeyo ekhanle erutthu awe, . . .*

186 Vano, vakhala wira erutthu aka yookhalana owerya vasulu va itthu sothene, nto erutthu aka t’ile ekhanly’aka. Eyo ekeekhai? Ti yeeyo ekhanly’aka, ti siiso sinkisuwel’anyu. Eyo ekeekhai? Ahe, nto, sothene Muluku aary’awe, Owo omwaraxenle mwa Yesu, okhala wira Owo aari oMuluku wothene woomalela mw’erutthuni. Eyo ekeekhai? Ni sothene Yesu aary’awe, Owo omwaraxenle muKereja, “Itthu iya



sinvar'aka, nyuwo-tho munoovara itthu sothene. Hata suulupale ovikana iya munoovara, maana Miyo kinrowa w'Atithi."

*Yeeyo ekhanle erutthu awe, omalela wa ole onsariha itthu sothene mwa sothene.*

187 Oh, moota enkisivel'aya yeeyo! Moota enkisivel'aya yeeyo! Miyo kaamusoma nihiku nlo eliivuru yaalempwe sa mukwaha mmosa kaaronw'aka olaleya—olaleya w'Afrika. Kiira kihinatoko osoma. Akavi atonko osoma eliivuru, *Profeta Onxekurya w'Afrika?* Mme kaamuweha mwammiravo mmosa muHinti. Akavi yoonale elatarato eyo?

188 Kahimwiiwa namalaleya ehapari mmosa, aavekelela aretta mwa iyaakha soophiyaka muloko ni thanu wala soovikana, owo khwira, "Nkinatoko wona mwiiriirya opakiwaka kookhalaru." Owo khwira, "Koowoona atthu yaahimya wira yaawereiwa muru, khuvona. Koowoona atthu ohimya wira yaawereiwa mmirimani, khuvona, ni sikina. Masi mwiiriirya, etthu epattunxe khupaka etthu . . ."

189 Koono wira mmirav'ole aahaana wira okhanleene vale khoona yeeyo. Mwetto wa mmirav'ole muHinti waari ntoko sa wunnuwa waya, mmosa aya. Mukina waari mwetto wooloka ntoko mwetto wa mutthu. Nto, nyuwo mwawehe vale, ttootto awe, yaahikhala exapattho awe ya isentiimeturu miloko miraru ni thanu ni nuusu wala miloko miraru ni thanu ni ttharu, sa. Owo aahikhalana nipawe na yuuma vathi vaya. Exapattho awe yaari vasulu wa ikopo piili soorakama seemenle. Owo aaheetta mpakha keemenly'aka-vo, aaruuhiwe vasulu vale. Owo aahikhalana attootto anli. Aakuxaka exapattho ela yuulupale ya yuuma n'urihela n'unyakela siisaale. Miyo khuweha mwetto awe, waari woowunnuwa saale.

190 Vano, atthu ale Amakaa, Amaka. Muhuupuwela Ettiminku evinre okathi koosomenly'akani etthu ixornaale saarin'aya olepa? Kookhalana vaava va yoomi, sa w'Afrika, kirooveeliheriwa ni murummwa ahu otthinke, Munna Stricker. Vo ori-vo artiiku a moota Billy Graham aatthikenly'awe ottuli mwa yeeyo. Vekeekhai. Awo yaarimwaahiya Amaka waakakhela mphareya. Mulattu aya xeeni? Arummwa anoorkhuma vapuwani. Efayita xeeni okhala okathi munci-ene, awo aaxintiwa tu.

191 Miyo kinnimphenta Billy Graham, ni kinoona wira owo mulopwana oottittimiheya a Muluku. Masi etthu Billy Graham vaakhanly'awe oomutuphelaka-no, wira, "Mulipelele minuutu mmosa . . ." vaakhanle wira aPatista kamosa-kamosa ala oowiiphita-phita yaahimuihiya owo wira, kookupali wira owo aamwiira. Kookupali wira Billy Graham mutthu a Muluku. Masi owo aahimye-ru wira, "Mulipelele minuutu mmosa! Miyo ka murumeyi a Ehapari yooreera. Nyuwo munnaamini Waataatana Wa Khalayi, ni muhimmye wira Yesu khaari hat'etthu woohikhala mutthu. Miyo kinnootharimulani wira

nilavule.” Miyo nkinaamini okupali mitharamulo sa xetwani, nnari mulopwana, masi miyo kaamurowa omuttikiherya mutharamulo, ni wira, “Nrowe nyuwo ni miyo nikumane vamosa. Miyo ka Totori a Divindade,” Billy Graham Totori a Divindade. “Mukihiye kootharimuleni mwa ela, ni mukihiye kiwooniheryeni wira Yesu aari ti Kristu. Vano, vaaphiyereryaka ovoniha wa Muluku, miyo nkirina soovaha iyo, masi nihaana axinna kamosa-kamosa arina. Vano, nyuwo mawatthuna waaruha atthu awo iwe, mukihiye kimwiihane mmosa a yaawo paahi, Oral Roberts wala mutthu mmosa, mutthu orina muteko muulupale aarowa okela vale vekeekhai.” Arowe iwe, vano nto ni wona enkhumelela, wira, “oKristu kuhiyo ele enuupuwelel’anyu okhala.”

<sup>192</sup> Vano atthu othene aniisoona owokiwa okhala wira owo orookhuma khumuhiya. Vekeekhai, vano, miyo nkinaamini wira xetwani onnootharamulani. Miyo kinnimusenyelaka owiitho wawe siiso, khukhuma vary’awe. Eyo ekeekhaii. Masi vaphiyerya nipuro va... Billy aamuwerya omukhaliha— aamuwerya omukhaliha Mmak’ole wona ntoko nlaki noonanara saale. Owo aamuwerya omukuxa Bibilia ole n’umukuxa Yesaya 9:6, ni wira, “Owo aamuhimya pani, ‘Nooyareliwa Mwaana mulopwana, noovahiwa Mwaana?’ Ari pani Mulopwan’ola? Aari pani Ula owo aamuhimya’awe? Aari pani Profet’ola? Aari pani Mesiy’ola aari wira orwe? Mukoonihe vatthu Owo iikumiheny’awe Mmansawe mwa Muhammad. ‘Owo ohaaxeriwe sootheka sahu, onyakatteliwe sootakhala sahu, ehukumu ennivaha murettele yoomulemela Yoowo, makhwatta Awe t’anivoninhe.’ Mukoonihe yeeyo mwa Muhammad. Moota Owo aakhuwenly’awe, ‘Muluku Aka, Muluku Aka, mukinyanyaleneni? Awo aathorola matata Aka ni inawu Saka,’ ni siiso? Mukoonihe ni moolumo anyu yeeyo, soohimya sanyu.” Vano, owo aamurowa omuxintta Mmak’ole voowereya mpakha ahaarow’awe osuwela vatthu vaary’awe. Eyo ekeekhaii.

<sup>193</sup> Masi okathi exornaale yaarin’aya orukunuwa, ti yeeyo yaananariha, yaairinhe murim’aka otthimaka. Vaahimaly’aya vale, “Enamwi Billy arina otthikela ottuli khuhokolowa, moota Amaka anwery’aya ohimya wira ele yaari yoovonyeya,” khwira, “okathi Reverendu Branham oDurban, wAfrika du Sul, mwa mwiiriirya ti mwiiriirya soohivaanyiheya, owerya wa Muluku, okathi Amaka ikonto muloko yaaipopheyaly’aya emaara emosa khuvahererya ekumi aya wa Yesu Kristu.” Voomalela. Awo annisuwela eyo. Awo a mulipiheryo annisuwela eyo. Muhikileele.

<sup>194</sup> Emaara emosa aahikhala mmosa aarwiiye wa Yesu, khwira, “Rabbi!” Moosuwela wira aari mFarisi. Khwira, “Hiyo noosuwela wira Nyuwo mwa Mwiixuttihi okhumme wa Muluku. Hiyo noosuwela. Hiyo noosuwela, ’okhala wira khaavo aakhanle

wiiraka itthu Nyuwo siniir'anyu ehikhanle wira Muluku ori ni yoowo. Hiyo ninnisuwela. Hiyo noosuwela. Masi khaninwerya ohimya, moone, 'okhala wira nahimya vale, ahe, nnimoomoliwa mukereja wahu. Moone, ninoopwetexa ottittimihiwa wahu." Vano siiso Yesu khwira, khupacerya omuleela wira aahaana oyariwa vasya.

195 Wa mmirav'ole Mmaka, okathi weemenly'awe vale, yookhala elatarato vale. Maakina a elatarato khankumiherya etthu yo wootha. Owo ori vale eemenleene vale, mwetto mmosa wookhuveya (woophiyaka isentiimeturu miloko miraru ni thanu na tthaaru) ovikana mukina, eemenleene vaxapatthoni vale ya yuuma. Khumwiirela, miyo khwira, "Munnilavula Enkelesi?"

196 "Nnari, mulopwana." Khaawerya olavula Enkelesi. Mutaphuleli khwira, "Owo khonlavula Enkelesi."

"Muri siiso okhuma liini?" Mutaphuleli khumukoha.

"Okhuma eyareliwo."

"Khamunwerya ottukhula mwetto hata vakhani?"

"Nnari, mulopwana."

"Munnimwaamini Yesu Kristu?"

Khwira, "Miyo ka Mmaka."

Miyo khwira, "Munoomukupali Yesu Kristu Owo oovonihani vale?"

197 "Kinoomukupali Yesu Kristu ntoko Moopoli aka Owo akivoniha vale."

198 "Owo avoniharu uwo, mwetto owo okhala ntoko mukina, munoomukupali?"

"Kinoomukupali."

199 "Ahe, Muluku, munrowa wira exeeni Nyuwo?" Ela t'itthu yootharelana; sookoha sothene sihaakhuliwa. Munna Mike, owo ti moonelo. Miyo khulipelela minuutu mmosa paahi wira koone etthu Owo aarow'awe ohimya. Miyo khuwehaweha vale khumoonna mmirav'owo arowaka, eettaka, ntoko vaxirini siisaale. Miyo khwira, "Akavi wa nyuwo Amaka munrowa okupali? Va ori mmiravo mmosa Mmaka, nkanweheni, mmukhalihe vale." Miyo khwira, "Nyuwo matothoro, munnitthuna omuweha? Ole eemenle vale." Oh, munnisuwela vary'anyu nto. Moone, munnisuwela vatthu vary'anyu. Khaavo . . . Owo aaphwanyaneya vale.

200 Miyo khwira, "Mweette murowaka nno, mwan'aka." Vano awo khumukuxa, owo khurwa. ("Ta-lump, ta-lump.") Miyo khwira, "Onikhala ntoko wookhuveya, isentiimeturu miloko miraru, miloko miraru ni thanu na tthaaru. Ntoko *siiso*."

"Ayo."

201 Miyo khwira, “Masi Yesu Kristu Mwaana a Muluku onniwerya onvoniha. Nyuwo Amaka munimwaamini ni omukupali Yoowo ntoko Moopoli anyu?”

202 Yaahikala matat’ale ikonto ooriipa yaavennyee siisaale. “Ahe, Pwiya, ola p’ukathi.” Miyo khwira, “Tithi a Wirimu, vakhala wira Nyuwo mootoko waakhula, mukaakhule vano, ela ti ya Ovuwa Wanyu, ela ti Yawinyu. Kinoovekelani wira munvonihe mmirav’ola.” Miyo khunvekelela siiso paahi.

203 Miyo khwira, “Murule exapattho anyu.” Owo khukiweha vootikiniha, mutaphuleli. Miyo khwira, “Murule exapattho anyu.” Owo khutaphula mukhoyi. Okhala wira miyo kaarimoono yoowoon’ele, etthu yaarowa okhumelela. Owo khurula etthu ile. Okathi okakhenly’awe ottuli khweetta vale orwaaka wa miyo, metto soomiili sooloka tu, soomiili seettaka ntoko misya. Miyo khwira, “Muntthuna mweette murowaka nno ni nno?”

204 Owo khupacerya wunla siiso, orowaka nno ni nno, khaasuwela etthu yo wira. Eettaka siisaale, owo khwira, “O, Allah! Allah!”

Miyo khwira, “Yesu! Yesu!”

Oh, oh, oh! “Yesu! Yesu,” nto. “Yesu! Yesu,” siiso.

Miyo khwira, “Yookhala yookoha, yookoha?”

205 Julius Stadskev, akavi ammusuwela? Munna Stadskev onnirwaaka va okereja; onoomalaru—onoomalaru orowa wAlemaanya. Khwira, “Minuutu mmosa paahi, Munna Branham, minuutu mmosa paahi.” Wira kimuruuhe namakumiha elatarato naanaano. “Pooti omukumiha elatarato awe?”

Miyo khwira, “Mukumihe.”

206 “Murwe *va*, mpwehe exapattho anyu *va*.” Owo khweemela siisaale, khukumiha elatarato ya mmiravo vale, ni metto soomiili sooloka ni soowookowa vaaweryaney’aya okhala. Vale yaari exapattho awe ni ekaruma awe yoomukhaliherya, *siiso, siiso*.

207 Miyo khwira, “Akavi wa nyuwo Amaka vano munimukhootta Muhammad ntoko profeta, vano munaamini wira Yesu Mwaana a Muluku, ni omukupali Yoowo ntoko Moopoli anyu yeenyu?” Matata ikonto muloko khurowa osulu. Aleluya! Awo khandthuna e . . .

208 Awo aneererya ovitha, okhala wira hiyo na “masantu oophirikeya,” awo annihana siiso, moone. Vakkanleru siiso, Muluku onimweetta. Owo onkhaliha Ekereja Awe voopuroni. Owo onniira vootepa, waatta ovikana sothene saakhanly’ahu wiiraka wala wuupuwela. Owo Muluku saana ohiy’ula ntoko sitonko awe okhala.

209 Tivo, axipatthani, mukihiye kooleleni etthu naanaano va. Aththu aka ooreerexa oophenteya, nyuwo nno elapo ela, ni akina

muniwa mufiitani ilapo sikina nyuwo munrowa okhala ilapo s'okhopela ni khula nipuro mury'anyu, muhoove. Itthu sothene siri saana. Muluku Tithi, ohinatthi opattuxiwa olumwenku, aahisuwela itthu sothene saarowa okhumelela. Itthu sothene sineetta vooreera. Nyuwo munnimphenta Owo? Mulakiherye murim'anyu.

<sup>210</sup> Ni, muupuwele, okathi ephumu ila enrow'aya okhuma mw'ekumi ila, wa nyuwo atokweene wala nyuwo amiravo, ni nyuwo aximai, mwawoona-ru axaan'inyu axikhaani, mwanamwan'ole muthiyana okhwiye ohirina mahiku mathanu na mararu wala mathanu wunnuwa wawe, owo onrowa okhala mwaamuthiyana ooreera okathi onrow'anyu omoona. Apwaapu ale yaakhurupunwe yothene, yahaawerya woona saana waarow'aya; okathi onrow'anyu owoona, piipi, awo anrowa okhala mmiravo oophwaneliwa, mmiravo paahi ntoko a iyaakha miloko miili, moowaaryani w'emiravo. Ni anrowa okhala siiso voohimala-tho. Munooowerya okwannya ntata naya, munooowerya ovahana mukhono n'awo. Munoorwala waapatikha, masi khanrowa okhala "iya," anrowa okhala "munna." Oh, wulu! Awo anrowa okhala vaalupalexa ovikana "iya." Munuupuwela wira mwaanaaphenta? Vekeekhai mwaanaaphenta. Masi uwo waari *fileo*; mulipelele mpakha mwaakhele *agapao*. Mulipelele mpakha Ophenta iwe wekeekhai wa Muluku okele, vano nto moone xeeni uwo. Ola nno paahi ori ntoko ikokhola sinoovya, kuhiyo wooreera, khiivo hat'etthu mwa yoowo. Etthu emosa enootumerery'akani wira vano, t'ila, apa—apa—apatthani aka. . .

<sup>211</sup> Ohoolo vakhani miyo. . .Mwaamutthuna wira kitthikele ikapiitulu iyo sikina emaaara emosa? Apwiya. . .Miyo—miyo kihaana omumula vakhani paahi kihinatthi orowa oChautauqua. Vano, nkikhanle oolaleyaka itthu iya mmuthukumanoni mme. Khareera-wo ooohi. . . inamuna sinciene so waamini soovirikana. Munnona? Ela ekereja paahi. Munnona? Miyo nkikhanle. . .Kihaana ehaakhi y'olaleya vaava etthu p'itthu entthun'aka. Ela etapernakulu aka, moone, ni kinooleelani nyuwo. Vano, miyo kinnaamini wira atthu ale t'owoopowa. Ayo, mulopwana, vekeekhai kinnaamini. Masi, oh, vaatepa-tho weetta musuwenleene vatthu muneett'anyuvo. Vaatepa-tho, osuwela, osuwela vekeekhai etthu eniir'anyu, moone, ohiya othweelelase, wiikwattulase. Nrowe nikhale moWaaryani, ni neetteke moWaaryani nto munooosuwela ephiro xeeni onrow'anyu. Eyo ekeekhaii. Apwiya ekhale ni nyuwo.

<sup>212</sup> Nto vakhala wira khula mmosa a nyuwo mu vano khamukhalihewe voopuroni! Hata muhikhalaka hat'etthu masi mwaneene etthoko muthiyana. Ahe, nyuwo muniira, "Munna Branham, miyo nkinaireke etthu kookhalaru. Nkihiyo mulaleyi." Ahe, khino Muluku ooruuhaleni mu wira mulele nloko n'anamwane, mwa nloko nenlo n'anamwane pooti

okhuma nloko nikina n'anamwane onrowa okhala mulaleyi onrowa oroiha minepa s'atthu emilyawu ntero wa Kristu. Mwaahaana okhala va. Nyuwo muri nno mwaha wa niwoko nimoso. Mwaanisuwela yeeyo?

<sup>213</sup> Ahe, nyuwo muniira, “Sothene kitonko aka wira, waari, ophelakasa ixa iye. Nto miyo kaanikhuma, ohiyu vahinatthi wiila saana, nkaasuwela moota wo ophwanya yolya y'an'aka. Kaanaaweha axikhaani yoonihaka othunku ehiwaranse ixapattho. Kaanikilaathi khunanla. Kaarina ekaaro yaamukhaani, nto miyo n'Amaama naanirowa okereja.” Muhixanke, munna. Mukhale mumphentaka Yoowo paahi, Owo ookhalana niwoko wa nyuwo. Mukhale siiso ntoko siry'anyu paahi, mukeleleke ohoolo paahi. Munnona? Khino khamunatoko olaleya hata mutthaka, masi siiso mukhanleene muhapwaapu a ole onrowa wira eyo.

<sup>214</sup> Mwaanisuwela wira Muluku aahimweemererya (nrowe noone vano, nsina nawe ari pani?) Levi, oliva sanamuloko okathi waary'awe mmuthanani mwa Abrahamu, okathi Melikhiseteki akumann'awe n'uwo. Akavi ansuwela yeeyo? Nto nrowe noone. Abrahamu aamuyanre Isakhi, Isakhi aamuyanre Yakope, Yakope aamuyanre Levi; yoowo aari tiithi, pwaapu, muhapwaapu; okathi waary'awe mmuthanani, mw'epyonni ya muhapwaapu awe, Bibilia aahimweemererya mwaha w'omuliva sa namuloko Melikhiseteki. Wulu, wulu, wulu, wulu! Munna! Oh! Miyo ka . . .

<sup>215</sup> Ookhala mukhaani—ookhala mulopwana mmosa mwaamukhaani Munkelesi aarukunxale murima wu ohiy'uwo oInglateera, owo khwira, “Nkireere otteeliwa murima! Nkireere otteeliwa murima!”

<sup>216</sup> Ayo, otteeliwa murima osuwela wira eyo ekeekhahi! Ni nihiku nlo noovuwa, nkisuwenle nirowa okhala liini, masi vakhala wira ele yaari yoowoona, nkinihimya wira kaari wenno. Muupuwele, mukhalane ela mmuruni okathi wothene, n'ale arina ifiita yiire siiso. Sinto kaari mwa yoowoona, wala okuxiwa mwa Eroho, miyo nkisuwenle. Masi yaari y'ekeekhaixa ntoko sininvarrel'aka Munn'aka Neville *saale*, y'ekeekhai saana. Ni kaaniwerya oweha n'ulavulana atthu ale. Nto vale yaaphwanyaneya amwaar'aka oopacerya, awo khiyaakhuwenle wira, “iy'aka,” awo yiirale, “munn'aka oophentiwa.”

Vale aaphwanyaneya mwali kaakhumaaka-no iyaakha sivinre.

<sup>217</sup> Khino atthu awe kamosa-kamosa akilanthe vaava, Alice Lewis a Utica, ooreera murima, mwali mmosa muKristu oororomeleya. Aahipisa otheliwa vakhani mwa makhalelo awe, ni aahikhalana mwan'awe oopacerya kukhwa oyariwaka. Alice Lewis, kaahirowa empa w'ovithiwa atthu wira kamoone. Miyo khuvolowa, khwiwa wira aahikha. Miyo khurowa iwe, khaakhanle hata mutthu mpaani, miyo khwira, “Ookhala

muthiyana mu, Muhano...” Nsina nawe aari Emmerke. Ni owo aatheliwe ni mmiravo mmosa muKristu ooreera murima, n’uwo aari mwali mmosa muKristu ooreera murima. Miyo kaanikhalaka ni mwali uwo mapuro othene, inamuna sothene sa mapuro ni itthu sothene. Nto anamwane paahi, a iyaakha muloko ni thanu na tthaaruru, muloko ni thanu na xexe, mapuro othene, muKristu ooreera murima, nkaasuwela hat’etthu ya yoowo masi muKristu ooreera murima. Nto miyo kaari natampii. Masi kaaneettaka ni yoowo. Miyo khuvolowa... Nto iy’awe aari muKristu ooyariwa vasya, mulopwana eekeekhai. Ni nkaasuwela; kaahisuwela wira aahikhwa, kaahoona muxornaaleni. Vano miyo khurowa iwe awo khukileela. Miyo khurowa iwe o oCoots nto miyo khwira, “Mookhalana muhano Emmerke?”

Owo khwira, “Billy, ori mpaani mme.”

218 Miyo khuvolowa mme khweemela vale vakhiviru vakaxawu. Khuupuwela, “Alice, kinnikhalaka mukalapooso mooriipelexa, kinnikhalaka iphiro sooriipela. Nyuwo ni miyo naaneettaka vamosa iphiro ni ipantte mukerekhere mwa muro, okathi waakhalaniwak’aya ikalawa sa teyaaturu, naanikilaathi vale ni omwiwa pankwe ole arumaka. Osulu ni vathi sa iphiro, muthiyana xeeni nyuwo mwaary’anyu! Moota onimuxukhuru aka Muluku mwaha w’ekumi anyu. Mwiitthyuuwe, munn’aka oophentiwa, mwiitthyuuwe ni murettele wa Muluku.”

219 Nto ohiyu umosa mwa yowoona, owo khurwa akitthimakelaka. Owo khwira, “Munn’aka ooreerihwa,” vano khukipweherya miyoono sawe. Oh, oh, munna mulopwana ni muthiyana, eyo yookirukunxa. Nkinkhalakhala-tho kikhala yoole. Ti y’ekeekhaixa! Ti yee—ti yeekeekhaixa ntoko sinooweh’akani nyuwo, y’ekeekhai siiso. Tivo, kuuvo woova. Khino miyo pooti okhwa ohiyu ohinatthi ovira.

220 Kintthuna kimulele mwammiravo aka ottuli iwe, Joseph. Kintthuna kimoone vapulpitu, kaaweryaka omukuxa Bibilia ola... kaaphiyaka nipuro omoona Joseph vapulpitu alaleyaka ntoko mmi—ntoko mmiravo oosareya Eroho Yowarya, ooreerihwa ni Eroho ya Muluku mwa yoowo. Ni kinnaamini wira onrowa okhala profeta. Nihiku miyo—miyo—miyo waamoonaly’aka iyaakha thanu na mosa owo ohinatthi oyariwa, nyuwo munnuupuwela wira kaahooleelani wira aamoowa. Munnuupuwela wira kaahimwiihana, vaavale vale valtaari, kihisuwelaka kaahimy’aka, kaavahereryaka anamwane, miyo khwira, “Joseph, nyuwo mwa profeta.”

221 Nto nihiku nikina kiryeene vaniyateni, owo khukirweela, nto khwira, “Paapa, Yesu ookhalana ntata ntoko nawinyu?”

Nto miyo khwira, “Ahe, ayo, mwan’aka. Mwaha wa xeeni?”

222 Owo khwira, “Miyo kaakilanthe vamucinkani vaka, kimuwehaka Sarah” (owo ti murokor’awe mwaamukhaani)

“arwaaka owaani okhuma oxikola.” Kaakilanthe vate vale. Miyo nkinimuhiya weetta mphironi, aakilanthe ottuli so. Nto khwira, “Miyo khuweha osulu, nto,” khwira, “okathi owehaly’aka, naahikhala ntata ntoko nawinyu, ni moonoo wa kamisa wootteela okivarenleene.” Ni khwira, “Owo khurowa osulu.” Khwira, “Nle naari ntata na Yesu naawela osulu?” Miyo khwaaweha ame awe, ame awe khukiweha. Hiyo khurowa mpakha owannyawe Muhano Wood. Nipuro pi nipuro vary’awe, okilanth’awe va. Hiyo khumukoha osulu mpakha vathi, nno ni nno, ni khula enamuna naawery’ahu. Yaari yoowona. Owo aarimoona. Okathi onwery’aka woona okathi wa Joseph mwaamukhaani eemenleene. . . Kinroromela wira kinookhala kimoone othenleene, Yesu apisa vale.

223 Ni miyo ka mulopwana mutokweene, manri oottweelela ari muxikoni mwaka mu. Kiheettiherya. . . Kinthuna kiroihe-tho minepa s’atthu imilyawu piili wala ttharu wa Kristu kawerya vale. Iwo p’utthuna waka wira kilaleye Ehapari yooreera khula ekompa ya elapo ya vathi. Ayo, mulopwana. Tivo, mukikhaliherye, Muluku, kinimwiira. Vano, kinniwerya woona okathi uwo orwaaka, Munna Mike.

224 Kinniwerya oweha okathi Amaama, Meda, kiniwiihana, oophentiw’aka, moone, ti yaawo. . . hiyo noopacerya wuuluvala, kinnoona maihi aya ekhalaka oottweelela ni kinoona wira ninoorowa, olakaseya.

225 Rebekah, kinnixukhuru vanci-ene mwaha wa Rebekah. Mulipa ommuxuttiha muusika aahikileela ohiy’uwo, khwira, “Wulu, owo atthikelaru siisaale, Munna Branham,” khwira, “ti voolipa ohimya etthu enrow’awe wira.” Moone, onookelela ohoolo mwa muusika. Kimmutthuna, ni kinthuna. . . Kimmutthuna Sara va orkawu, Becky vapiyaanoni, kimmutthuna Joseph vapulpitu.

226 Kawerya woona yeeyo wiiraneya, nto miyo n’aMaama nnoowerya ovolowa niveveleyaka, miyo ni ttootto aka a khalayi, ohiyu uwo, orwa kittharaka ephiro, nto kinoowerya oweha vale omoona mmiravo aka eemenleene vale oorerihiwa ni Eroho Yowarya, alalayaka Ehapari yooreera yeela. Kinthuna kimukuxe Eliivuru yeela ya khalayi, kiire, “Mwan’aka, Ela va, Ti yawinyu. Mukhale ni Yoola, muhisakalelihe hata Nuulumo nimosa. Mukhale ni Yoola paahi, oophentiwa. Muhiire, muhicali, nkincala ti pani onovirikanyani, ti pani onvirikanya’, Muluku onookhala ni nyuwo. Mulaleye khula Masu ntoko silempwaly’aya Mmo, nto Apaapa anoowoonani epantte ekina ya muro.” Kaatthuna kaapatikhe kaavarele mmoononi mwaka, amwaar’aka, nimulapuwe Yordani.

227 Mpakha okathi uwo, Muluku, mukitthuniherye kikhale vapuwani, ooromeleya! Mukitthuniherye! Khenikicala enthuneya, wala kavi, etthu enir’aka, wala *ela, ele* wala



*ekina*. Mukitthineherye kikhale oororomeleya ni eekeekhai wa Masu a Muluku mukumi, wira nihiku nlo naphiya vale miyo khulapuwela iwe, ni kiwerye oweha epantte ekina kiire, “Eyo vo. Oh, mpatthani aka ooreerexa, munn’aka ooreerexa, munn’aka muthiyana ooreerexa.”

<sup>228</sup> Mulaleyi mmiravo, mukele vapuwani, mukhale mmutekoni. Othene nyuwo alaleyi amiravo n’itthu, muhikilaathi. Muhikilaathiki paahi voohira etthu. Mukhumele iwo mwaphwanye minepa s’atthu. Mwiire etthu! Nvare muteko, mukhale murowaka ohoolo. Muheemele, mulaleyi mmiravo iwo. Muluku areerihe murim’anyu.

<sup>229</sup> Owo onikuupuxerya okathi waary’aka a munnuwelo yoowo, woona waka, nto khino ootepexa okhala mmiravo onvikana owo. Kaarina iyaakha soophiyaka miloko miili paahi n’itthu okathi kaathipeny’aka nliku nle vale n’olipiha vale. Kinnuupuwela wira kaawaraka ekhasako yooripelela ni ekalsa yootteela, nto khweemela vale khuthipela nliku nle noolipiha mwa iyaakha soophiyaka miloko miraru sivinre. Moone moota kaary’aka mmiravo, kaari mmiravo paahi. Keemenleene vale paahi, kithipelaka nliku nle noolipiha. Nkinasakalelihe hata Nuulumo nimosa. Miyo kinootthara oratteene ntoko sithipeny’aka nliku nle noolipiha. Vale oniphwanyaneya onamoon’aka ory’ene iwe, vaavo kilepaly’aka vanikukhuni noohikhal’etthu na Bibilia, khukhera khupweha vanlukuni vale noolipiha, nto nlelo nri vaavale. Ni elempwe mmakukhuni mwa Masu Ahinimala a Muluku Wirimu. Mukitthuniherye kikhale eekeekhai mpakha wokiseryani.

Nrowe nuurame miru sahu vano minuutu mmosa paahi wira nivekele.

<sup>230</sup> Woomalihani w’ohiy’ula, omaliha wa iya, ekapiitulu emosa, ehooniheriwe. Mwaahaana okhalana ekina, moota owo onkelel’awe ohoolo n’ukhalaha ekereja voopuroni vaya. Kinimooruuhelani okathi mukina, Muluku atthuna vale. Kihaana omumula vakhani paahi vano kihinatthi orowa oChautauqua iwe, omuthukumanoni mukina muulupale, nuumala kinoovira iwe kirowaka Oklahoma, okhuma iwo mpakha Ekhwarara y’oKlamath, nto n’ukhuma Ekhwarara y’oKlamath kinrowa oCalifornia, kirowaka mpakha Yakima, nkinthika mpakha Agosto onrwa mahiku yeetaka 15.

<sup>231</sup> Masi nwehe, mukihiye kookoheni etthu, vakhala wira enoowiirani etthu wala miyo okathi uwo ohinatthi ophiya, vakhala wira kihaana olapuwa muro kirowaka mutteth’ole, wala nyuwo mwalapuwela vale mutteth’ole okathi uwo ohinatthi, munnoona nrromelo ohiy’ula wira ninoorowa okumana nipuro nenle? Moonaka vale, nvenxe ntata nanyu, mwiire, “Kinnoona nrromelo mmurimani mwaka.” Muluku areerihe murim’anyu. Muluku ooreeriheni. Aakhanleene mmosa

va ohinoona nrromelo wira yaamukhala iwe, ni aathuna ohimya wira, “Mukuupuwele, Munna Branham, wira kikhhalane nrromel’owo,” nvenxe ntata nanyu, “Kintthuna kikhale weiwe, nave.” Muluku ooreeriheni, muhano. Muluku ooreeriheni.

<sup>232</sup> Tith’ihu a Wirimu, hiyo ninniruuha wa Nyuwo ohiy’ula muthukuman’ola, khula ntata, ntoko sinsuwel’aka, nivenxiwe. Othene woohikhala mutthu mmosa, minepa kamosa-kamosa soorikaxa sikilantho va, ooriipiwa murima vakhani sinto yaamurowa olapuwela mutteth’ole, weiwo ori-wo ophenta w’emuluku weekeekhai woophiyerya mmurimani mwaya, vamurima va muthiyany’ole ooreerexa, wira owo aamurowa mutteth’ole vaakhanle wira onookhwa ohiy’ula: waamurowa okakhela munep’awe wooriipiwa murima Mutteth’ole wa Natiri wa Muluku?

<sup>233</sup> Tithi Wirimu, ntoko seemenly’aka va epulpitu ila khulaleya, khuviheriwa, khunla, khuvara metto, khulopola, mukitthuniherye koovekeleni-tho, Pwiya, mukitthuniherye koovekeleni mwaha wa munn’aka muthiyana ottuli iwe; Muluku, muhele mmurimani mwawe ohiy’ula: ophenta iwo w’emuluku, Eroho Yowarya ele ya Muluku, murettel’ole onvikana musuwelelo wothene, wira owo aakhele Eroho Anyu, otthittiwe ni Eroho Yowarya mpakha nihiku nenlo. Kintthuna kimoone, Pwiya, okathi onrow’ahu olapuwela muthato. Vakhala wira ti—vakhala wira ti—vakhala wira t’ureeriwa waka olapuwela, vakhala wira ele Nyuwo mukoonihaly’anyu ti yeekeekhai, nto khulapuwela iwe, kintthuna kikumane n’uwo weiwe, ni kimoone owo otthimaka okivara ntata, ni wira, “Munn’aka ooreerexa, waari ohiyu yoole Ethu emosa yaakihimeeraly’aya wira kivenxe ntata naka, okathi mwaaleery’anyu eliivuru y’aEfeso. Miyo khuvaxa ntata naka, nto yaahikikhumelela ethu nuumala yeeyo. Miyo kiri va. Vano ka mmiravo voohimala-tho.” Muluku munvahe yeeyo ole ooreerexa.

<sup>234</sup> Ale avenxale matat’aya atthittiwe ni Eroho Yowarya, Eroho ya Muluku eri mwa yaawo, ni ahaakhela Eroho Yowarya, awo aatthittiwa ni ophenta w’emuluku mmurimani mwaya. Moota onooxukhuru-ahuni Nyuwo mwaha wa yaawo.

<sup>235</sup> Nisuwelaka, Tithi, wira ifiita iya sinoorowa mulaponi. Miikoro sinci-ene sihookoliwa vapulpitu va, enihimya wira ifiita iyo sinoopakiwa, siroiha weiwo, Nsu ninoorowa ilapo soohiyana-hiyana molumwenkuni, molumwenkuni mothene, ilapo miloko miili wala miloko miraru soovirikana sinimwiwa. Kimmuvekelela khula mutthu oniwa efiita ela, ohirina nrromelo wa Ekumi Ehinimala, ohirina opatiiso wa Eroho Yowarya, wira Eyo erwe mmurimani mwaya voomaaleleya. Munivahe, Pwiya.

<sup>236</sup> Ni wira miyo, kaahikhalakhale kiwoonaka mwa ekumi ila, okathi onrow’aka olapuwela mutteth’ole, awo etthimake

ekivare (ni miyo kaavare, n'awo, hiyo nikhuwele, "Munn'aka ooreerexa!" mmosa ni mukhw'awe), yiire, "Kaahiiwa efiita anyu mwa aEfeso, moota Muluku onitthomenly'awe Ekumi Ehinimala, ni waari mufiitani memme kaakhenly'aka Nsu na Muluku khutthittiwa ni Eroho Yowarya Momweneni mwa Muluku." Munivahe, Tithi.

<sup>237</sup> Mwaavonihe ale othene anwereiwa ni aripiwe murima. Mphwanye ovuwa Yeenyu maana hiyo ninvahererya sothene iya wa Nyuwo ni wiilipiha wothene mwa Nsina na Yesu, Mwan'Inyu. Amen.

<sup>238</sup> Ookhala mutthu va onwereiwa ontthuna wiixaatheriwa matata wira evekeleliwe? Munnitthuna ovenxa matat'anyu? Vaareera. Mweette vooaaleleya, vano, murwaaka waltaari nno, nto mweemele okathi vakhani paahi, Munna Neville arwaaka ni yawawe . . .

<sup>239</sup> Oh, ela enkhala ntoko, waavekelela aretta, vekeekhai—vekeekhai enkhala ntoko orwa nipuro vansuwel'anyu mweemenly'anyu, khweeli. Muluku onnisuwela sothene wa yeela.

<sup>240</sup> Vaiwaly'aka esipo ele . . . Muupuwele, mwakhala mukumi okathi onrow'aka, mukirumihele yeela miyo: *Waamini Paahi*. Muupuwele, miyo nkikhwiye, nkinrowa okhala ottaiwenexa wa nyuwo kiiwaka yeeyo. Nkikhanle okhwaaka; Yesu ookivaha Ekumi Ehinimala; onoorowa okihihimuxa nihiku nookiserya; kinoorowa owoonani. Nto nyuwo mwarowa vale, kinimwaamini etthu emosaru wa nyuwo. Kinnaamini wira ninimoonana-tho mmosa ni mukhw'awe.

<sup>241</sup> Kinwehaka, muhan'ola ooreerexa eemenle va orina maihi oottweelela. Nyuwo mwa muKristu? Oosareya Eroho Yowarya, mummulipelela Owo orwa, mweemenle va munlilipelela ekalawa orwa. Amen. Oh, munna . . .



*OKHALIHIWA AANA* 4 EMK60-0522E

(Adoption 4)

ETTHARANELO YA OKHALIHIWA AANA

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeetaka 22 mweri wa Maio, 1960, oBranham Tabernacle oJeffersonville, Indiana, w'Amerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)